



門 6
號 3001
卷 14

門 6
號 2301
卷 14

門 6
號 3048
卷 14

崑新兩縣續修合志卷三十一

文苑二

國朝

○孫元凱字若士明季與太倉顧夢麟常熟楊彝並以諸生主文柄有聲復社詩宗昌黎古文嚴峭近柳州九躡棘闈立講舍於東皋集四方學者研窮大全蒙引諸書標經權傳務揭其微史可法開府揚州辟參其軍元凱著兵事七策切中時務卒以馬阮當國不能用後陳名夏薦之朝固辭不赴及名夏禍作人皆服其先見云

○李可汧字元仗原名開鄴字賓侯眉昌孫工詩古文吐納風流兼曉音律明崇禎己卯以郡諸生領鄉薦順治

昭和九年
六月十八日
碑末

乙未成進士授行人遷刑部主事有訐人作詩觸時諱者將得罪可汧見之曰此唐薛逢作開元後樂大概言天寶亂後事耳事乃寢擢湖廣提學僉事內艱歸不復出康熙十年邑大水出粟千石賑之卒年六十一兄可衛字爾公能詩文入復社通青烏術可汧子遙章字東嶼亦工詩著八代詩選考辨精覈爲詩家所稱

○葛鼎字端調錫璠第四子兄弟皆力學鼎與兄鼎齒培尤相策勵夏月共帳臥徹夜論故事誤者罰驅蚊又戲仿師生禮取諸經疏高坐問難以爲樂明崇禎三年鼎領鄉薦時年甫十九公車報罷益購所未備書編次唐宋諸家文集美而無譏論而不議梓成風行海內鼎好

學深思嘗書其座右曰悲莫悲於心死而身死次之見者悚然鼎革後有司迫上公車故違例放歸不再赴大學士王鐸爲諸生時錫璠嘗振拔之後其弟鑰令崑崑竟不往謁同年爲直指造廬請見亦謝卻時論高之長子雲漢以邑增生遊太學與商邱宋犖爲詩友逮犖撫吳累招雲漢卒不往雲漢長子世隆幼爲同邑徐乾學器賞妻以女以貢官銅陵教諭罷歸讀書養親以老

○邱鍾仁字顯若一字近夫萬垓子幼受學舅氏朱集璜通諸經大義冒朱姓補諸生後居兩喪皆遵古禮弗飲酒食肉旣謝舉業惟開示來學於孝經春秋尤多所發明參議方國棟泣吳延主其塾國棟疾亟以孤辰爲託

皇朝兩縣續修志 卷三十一
鍾仁護其喪北行遂膺博學鴻詞薦、召試卷一夕播
人口既而授內閣中書舍人踰年南還卒河間舟次
○曹夢元字元徵父秉銓字衡叔有文名夢元以萬歷末
補諸生嘗遊西湖得遺珠一囊求其人還之問姓名不
告當乙酉城陷之際士民男女死者不可數紀夢元與
同志張立平立廉拾遺骸葬之仁緣塔又慮諸殉難者
湮沒不彰日攜筆墨手一編訪姓名而錄之隆冬盛暑
靡間分類編輯曰崑山殉難錄一時死忠死義死孝死
節實賴是錄以傳未及付梓而夢元卒後纂修郡志爲
無錫友人持去流轉三十餘年子价仍於無錫購得乃
乞邑人徐秉義序而行之

○張乘字漢章初名元炳思南守汝舟五世孫少遊庠入
復社順治中以貢授石埭訓導能立師道振人材故人
莆田楊夢鯉令鄰邑公謁往來從無私瀆所著詩古文
皆樸茂有法旋里後偕諸名流觴詠以老同里張雋字
令光甫成童補太倉諸生試輒前茅康熙中以貢授蒙
城訓導念士習澆薄文風靡敝月課而旬校之蒙士蔚
然改觀歲旱蝗糾邑人賑粥以濟上游將特薦以不勝
繁劇辭乘子凌雲字賦臣由拔貢官甘泉令

○呼谷字德下曾祖承惠撫於曹冒其姓谷初名簡在性
嗜學夏夜讀書納足甕中避蚊蚋崇禎初補諸生後遭
國變謝去復姓更名谷作呼氏譜傳至五六世以上不

能詳乃遍訪同姓渡江往汴歷西安繞汾晉入燕從齊魯歸惟於咸甯三趙村得諸生含初其從父謚以單呼無考綴以延谷謂劉向列仙傳酈道元水經注並載呼子先升僊事宋史徽宗與金議和將軍呼慶奉使不辱命何謂無考含初欣然從之谷工詩多悲憫之詞葉方藹輯獨賞集邑人詩入選者七人以谷爲首門人李稷臣字粒民明光祿魏庠五世孫諸生以賦冊呈誤工古文順治中嘗至京主宋獻策家紀獻策事甚詳

○宋汶字子弗一字閔叔遭亂妻楊殉節汶傷耳不死工詩善篆楷隸草尤善畫竹同時諸生張維芑字同甫明舉人厚德子工吟咏勤學問入復社有名嘗建普同塔

掩齒幣又張辰字定三性樸愿少從嘉定侯峒曾遊得其風範以詩古文自許日惟攢眉吟誦不休遷吳又遷槎溪老死無子

○徐與喬字揚貢應時曾孫父開禕字休倩嘗捐貲濬大石浦舉同善會與喬從朱集璜遊肆力經史每讀一書必反覆參互下逮方言物考音義章句無不通以訓詁絲分縷析而後止順治十四年領鄉薦十八年成進士將授官以奏銷呈誤已而同譴者獲滯雪登用與喬獨不自辨杜門著述取經史子集可爲文章根柢者採擇評釋以類相從歷數年成初學辨體一書爲藝林推重卒年七十二從弟與崗字子威諸生置書數千卷閉戶

離校劬行側注朱黃爛然亦以文學稱與喬子歲貢生向揆字樂原受學於朱用純以名節自勵工詩文

○盛符升字珍示世居澱湖少補諸生從張溥夏允彝遊順治庚子舉鄉試出新城王士正之門益殫究詩學康熙甲辰成進士授內閣中書移疾歸起補禮部主事纂修會典視權輿關擢廣西道御史嘗疏請詳定律例語甚剴切旋罷歸三十八年 車駕南巡符升獻三京三駕平朔會同館等賦時年八十五矣 御書年登大耋四字賜之明年卒符升篤於師友爲諸生時受知縣令萬曰吉日吉殉難金陵迎養其妻於城東尼舍歿則與曰吉合葬北郭歲修祀事弗絕又以允彝死難後

裔湮沒與李可汧往葬其一門知縣董正位聘修邑志與葉奕苞輩參稽考訂垂成而正位去官工遂寢

○徐宏化字完吾邑諸生安亭人與張埏姚允文居草深菴講明關閩伊洛之書所爲古文辭有奇氣不屑剽竊前人語臨摹法書各臻其妙晚益潛心經義於毛鄭尤多所發明從遊至百人卒後門人私謚孝節先生

○葉奕苞字九來國華次子少師事葛芝葉鴻儒務根柢之學工詩善書法康熙戊午舉博學鴻詞被擯歸葺半蘭園與海內名流姜宸英施閏章陳維崧及同里徐開任歸莊等流連觴咏文采輝映一時間集秦漢以來金石碑刻辨證隸釋最詳覈又作太甲改元周公居東周

詩用周正辨諸篇穿穴經義有裨學者與盛符升輩預修縣志未竣而邑令董正位罷官奕苞乃益悉心搜訪別成志稿二十二卷隸事必求其實家世必詳所自於全邑區畝考尤條分縷析爲他志所不及

○龔賢字半千移居上元能詩黃周星周亮工朱彝尊皆推重之嘗梓中晚唐詩紀行世兼工書行草雄奇奔放仍不失矩矱與同邑周如凱何灋皆以詩名而賢尤著如凱字元暘戊申己酉間與四方名流賡和於嘉定之東岡陳瑚爲之序灋字方衡兵燹後僑居吳江門多長者車家貧喜作詩長歌當泣讀者悲之

○王晨字農祥鄖陽巡撫永祥子年十二喪父補諸生著

文譽賦冊呈誤隱居西郊之碩園亭館參差竹木掩映日臨池染翰吟嘯其間性質直有古風偶之京見司寇徐乾學輒稱大哥極言家園之樂賦詩招隱乾學語人云自通籍以來久不聞此稱謂矣歲饑致書虞山翁叔元以地方情形屬呈當事語甚切至時論躓之

○葉開五字豫章邑諸生就館郡城嘗覓異書於書肆高吟朗誦有以文往質者跡所在得之開五索筆點竄成章觀者錯愕素工詩兼善狂草窮老不得志作討書檄廢書吟詞旨激楚讀者酸鼻同時甫里諸生金露字越沙工詩探原騷選格參中晚與長洲許虬並稱

○徐履忱字孚若應聘曾孫九歲能作詩歌小賦十二喪

父開澤十五補諸生尋依其舅顧炎武避兵尚湖之濱
胡_一討論後讀書郡城與諸名流結社倡和詩人林若
撫_得履忱詩輒手錄之嘗北渡江淮過中都遊汴梁毫
潁之墟南渡錢塘抵閩粵遇讀書稽古者往復論議兼
搜山水古蹟碑碣而題識焉入成均後往來齊魯燕趙
間紀遊益富所著匏叟詩鈔同里葉方藹及從弟乾學
爲之序年七十二卒子世準廩貢生世灝諸生

○顧需枚字虞功鼎臣七世孫爲文原本經訓醇厚有法
以廩改北雍中康熙己酉經魁庚戌成進士未仕卒從
祖弟維禎字景原爲諸生有聲性倜儻然諾不苟工詩
所著心聲集麗而不靡博而不濫上虞潘永祚序之

○盛傳敏字訥夫幼孤孝事其母師事太倉陳瑚於象緯
兵農禮樂靡不通曉從軍閩中旋棄去遊迹幾遍天下
後入都館朝貴家未嘗輕出投一刺遇故鄉親友困阨
旅邸者輒傾囊相濟喜飲工詩與同邑楊子水鄭儒纂
釋唐詩多前人所未發子水字西池諸生善草書得邱
龍門之傳儒字魯一兩人文行相同與傳敏稱三友
○蔡方炳字九霞懋德次子補長洲學生博涉羣書於理
學政治典故考訂該洽能詩兼工篆草初懋德殉流賊
之難藁葬太原城外東岡值世亂道梗不得通至順治
五年方炳始往山西扶父柩歸葬撰行狀上之史館康
熙戊午舉博學鴻詞報罷歸益潛心理學體究良知之

指其所論述期於闡發聖賢精奧睢州湯斌撫吳延與
講論深相契合于成龍總制兩江重其學行辟修一統
志年八十四卒

○戴虞皋字性公少補諸生以賦冊呈誤謝去性篤厚撫
從子如子營其師之喪葬復成立其孤虞皋五世祖純
嘗著易解原本程朱當時學者宗之亂後僅存繫辭一
卷虞皋窮探極索幾二十年續成上下經解又作大學
中庸義疏年八十餘卒

○馬鳴鑾字殿聞玉麟孫康熙癸丑進士選庶吉士授編
修丙辰分校禮闈所得皆名宿鳴鑾少好學於經義箋
注傳疏博綜貫穿分析其同異而標記之引疾歸焚香

靜坐門無雜賓故人有勸駕者領謝之而已

○王緝植字建伯志慶孫父湄臨卒授以一簡論成人之
道數百言時緝植年方十四泣受命深自刻勵列入成
均充官學教習康熙乙卯魁本省明年成進士授中書
舍人尋中蜚語不自辨歸構別業於山麓曰柘園清池
古木奉母婆娑其間與同里盛符升從弟喆生輩弔古
賦詩有勸駕者笑而不答漕帥赫壽重其行題養高樂
志額以贈既而總制兩江公事過崑造廬請見緝植惟
懇奏減浮糧終未嘗干以私卒年七十六

○朱謹字二陶隆祿五世孫少遭亂廢學及冠始從師旋
以病輟業間訪菊村落歸而玩月忽有所得發篋中書

讀之頓覺字句外別有會悟中年居郡城與山陰楊賓
慈谿姜宸英三原孫枝蔚相磨切學日進繼遊粵東見
聞益擴爲文存液去膚詩亦獨抒心得嘗輯馬鞍山志
頗爲精覈晚歲南海補但山僧聘修山志四明諸名士
咸推服焉日本國王欲迎修國史以年老卻之尋卒
徐樹本字道積元文子元文弟昂以古學倡吳中賓禮
耆宿如錢澄之萬斯同輩皆折節與樹本交康熙丁丑
成進士選庶吉士授編修充一統志纂修官乞歸養母
讀書於典章制度條挈件繫爲有用之學詮次漢魏三
唐詩辨其源流體格梓行於世

○徐筠字雲拂吉安同知懋之後祖碩父清並勵學行筠

讀書數行俱下性嗜酒放筆成詩傳誦遠近工書法有
墨令乞書裂其帛擲還貴客欲合譜賦野菊詩謝卻之
時諸生徐杏輔字芳來童年有文譽沈酣詩律亦嗜酒
人稱南北徐而筠詩尤勁挺與筠稱莫逆交者又有諸
生戈陸明陸明字稚圭父文昭嘗選評秦漢唐宋文問
世陸明性冲澹工詩規撫西崑時有奇氣

○張雨時字章夏邑張巷人以貴雄於鄉順治末徙城內
父芳字元之多陰德雨時少受學於王之垣末冠補諸
生尋以例貢成均連試不售乃棄舉子業肆力於詩每
登臨紀勝翛然風塵之表進士王緝植重其才品命其
子廷然與之遊處焉

○余起霞字丹舒國柱從孫少負才從長洲汪琬遊詩古文悉有法度兼善六朝駢體餼上海庠循資貢成均益刻勵爲經世之學嘗上書巡撫張伯行累數萬言如築圩岸濬支河緩徵舊逋官收漕餉皆切中時務伯行多采納焉已又取邑人周夢顏所梓東南財賦考作書郵寄朝紳勸以奏減浮糧時論譴之起霞穎敏博學嘗廣羅海內名人著作彙成一集題曰皇清文貫又遍搜古今可喜可愕之事作竹窗雜記晚歲著述日富四方徵求傳誌碑銘者踵相接卒年六十

○葛懷字儒初錫璠孫肅子諸生授餼安貧力學詩文隨所抒寫風發潮湧兼善八分書以歲貢終從弟雲薛字履坦購長子諸生績學工詩好施予荒歲分任賑粥必悉心力其他公舉謂非儒生分中事輒不與貴顯有欲招致門下者笑謝之亦以明經老

○呂熊字文兆偉軀幹戟髯鐵面目光炯炯父天裕遭國變命熊業醫毋就試熊少嗜詩古文于成龍巡撫直隸聘入幕一切條議皆出其手同事忌之拂衣去越數年成龍再延入幕及爲河帥將薦授通判俾自効熊固辭之已適越上子陵釣臺訪括蒼洞天石門瀑布諸勝至江右以當事多舊交僦舍東湖東湖故徐孺子蘇雲卿遺蹟也流連詩酒久之去客南安守陳奕禧所復度嶺爲廣州修郡志事竣返東湖尋歸里卒年八十餘

○徐昂發字大臨世居真義康熙庚辰進士選庶吉士授
編修典福建甲午試督江西學政以事獲譴尋卒昂發
少負才名初出宮詞八十首遠近傳誦中益精詣宗伯
韓茨稱其有事外遠致蓋得力於漢魏以來不沾沾規
撫唐人而亦無意於矯之者爲文簡潔有法尤精行楷
書出入晉唐尺簡寸楮人爭藏弄以爲重

○錢金聲字振玉幼能詩康熙乙酉

聖祖南巡金聲以諸生獻詩取入宋金元明四詩館纂修
母艱未赴丁亥 車駕復南巡獻謝恩詩十章一時
所錄如徐葆光吳士玉輩相繼登顯要金聲念父年老
堅志終養咏歌自適不復作出山想邑令趙光謨聞其

賢延訓其子三載絕無干請卒年七十三同時以賦詩
獲知者有王維漢維淮維漢早卒維淮字穎東官西林
知縣金聲子治字景范由選貢充教習期滿試令江西
補宜黃居官以誠待下百姓悅服以疾告歸卒

○陳省字梅麓少工制舉義與劉澤乾並名子弟就學屢
恆闖戶外究心性命之學而不庸附洛閩雅能詩晚棄
去獨評釋左國以下曰南園述古年六十貢成均尋卒
子四長子振字雖西沈潛好學就試三邑院試並獲雋
乃補本邑諸生嘗作避暑諧談時盛稱之卒年二十四
仲子三欽字泰瞻康熙甲午舉人季子選字履中姿性
高超作文運筆如飛日可得十餘首以諸生終

○葉澧字蕃九宏儒子少濡染家學長入北雍徧歷燕晉兩楚齊魯趙魏之墟凡輿圖阨塞土風人物莫不鈎稽默識於古今典憲尤爲綜貫嘗編輯崑山人物績考足資邑乘之助性亢爽無脂韋習論列天下大事寓諸詩歌悲壯沉雄而出之以蘊藉得風人之遺

○周樞字隆吉邑諸生居甫里發憤下帷嘗獨居小樓三年不下操選政風行一時從游者日衆常熟進士嚴禹沛邑孝廉蕭龍江其尤著也著有四書貫說易經廣要等書龍江字穎達勤學如其師康熙庚子領鄉薦雍正丁未中明通榜需次兵部武庫司未任卒龍江亦家甫里爲陸龜蒙咏龜巢故居舊有志而軼龍江網羅散失

輯有甫里文獻行世

○俞廷棟字永懷先世居綽墩山下祖賡颺以長厚稱築山來居延名師課孫允升砥志儒術遷居東城聚書數千卷口誦手批尤以睦婣任恤稱廷棟刻苦向學舉康熙己卯鄉薦授桐城教諭務以名檢勵諸生祛浮華崇經術每課士鄰邑麇至學舍幾不能容陶鑄多成國器性廉介峻節自矢常俸外不名一錢郡守委修邑志釐綱析目具合史裁母喪歸卒長洲沈德潛爲立傳

○徐世溶字德御應聘元孫庠生開度孫兄樹言字上瀾以文藝稱世溶稟質誠樸而好學深思嘗病四子書講章繁猥乃用直解說約體裁集宋元明諸儒書精義而

參以近日名家之論彙成一書名四書集義積十四年而後定康熙庚子舉於鄉年已及耆遂謝公車專以啟迪後進爲事卒年六十九

○徐廷璉字聖俞中允開禧孫松江府庠歲貢生爲文專宗先正康熙甲子後文尙輕新甲戌歲學使邵嗣堯得廷璉卷目爲起衰式靡試文出傳鈔殆遍性溫雅喜獎誘後學兄廷詒字欣公弟廷諍字君謨並諸生有文名廷詒曾孫瓚字象賢少孤貧赴郡試未竣事而歸郡守胡觀瀾特拔冠軍又二年始補諸生瓚恬淡有守工詩清微幽峭絕去雕飾亦善古文詞嘗著淞南闡幽錄倦倦師友之間與族祖凌雲先友傳略相仿以歲貢終

○劉深恩字靜濤邑諸生儀表秀拔耽文史總憲李柟嘗稱其學富才贍而不囿時趨爲後起中不易得郡守交城李若泌深恩素交也蒞任後踵門訪之絕不及一私事性愛潔好藝蘭與一二素心人清談娓娓不倦父卒時深恩年已六十猶悲痛如孩穉時又六年卒

○張元賡字皋載大復從曾孫幼工詩文爲邑令金潮所賞識嘗仿于寶搜神記作述異卮言頗奇崛大復梅花草堂集歲久板漫漶有力者知元賡家貧欲奪之不可其友汪中鵬爲補訂重梓之其書賴以垂久云

○支張鑑字彤九如璋曾孫讀書若宿習仲兄雋塚舞象遊庠嗜古博覽鑑每語典籍軼事雋塚戲之曰汝空腹

何時得滿鑑愧之早夜蒐討未五稔涉獵殆遍與兄縱
談仲輒訕年十六補諸生益肆力於文沉博絕麗爲同
輩所推服試北闈不售考補官學教習期滿例得縣令
遽卒鑑在京邸嘗詠白丁香詩稱一時擅場伯兄守默
字太冲能古文叔駿均字載平亦工詩並以歲貢終雋
琛早失明詩才清絕一門稱四難云

○黃子雲字士龍邑信義人祖貞孟父濟皆稱長者子雲
幼能詩長入都嘗偕編修徐葆光奉使琉球足跡所經
南北萬里得風雲山水之助氣益壯詩益豪一時名動
公卿有欲以鴻博薦者子雲堅謝之遂棲郡西山中以
老子雲嘗過鄒縣孟廟作詩有戰國風趨下斯文日再

中之句時庶吉士鄒涇同宿廟旁夜夢殿中懸十字覺
而記之後乃知卽子雲句初子雲執弟子禮於葆光一
日葆光下階拜子雲改稱先生日向之抗顏以未見先
生詩故也金壇王澗爲書長吟閣三字贈之子雲兼精
書法與釋正誼埒盛爲時所重

○顧易字中孚恂九世孫受龔太倉學改歸新陽少罹家
患父仁謐遊京師母歸氏督課之年十六母病危顧天
祈代剗臂煑糜以進出後伯父力貧奉養居平精探洛
閩之學嘗著操存得仁二圖得先儒未發之旨慕陶靖
節之爲人自號柳村所著律陶讀陶譜陶長洲沈德潛
亟稱之子愷香諸生愷量自有傳

○朱存章字亦仁高孫宋普子敦孝行父子昆弟間有大邱家法雍正間選貢入都充教習分校三朝實錄館選授湖南道州州判遷靖州直隸州判累攝縣事潔己愛人苗獠感化卒於官存章少通敏工詩文端莊流利似其爲人書法亦秀勁得唐人意

○朱厚章字以載存章弟幼穎異八歲攻舉業日課兩藝字不加點補諸生食餼博覽經史僑居嘉定爲徵士張雲章所器宮詹張鵬翀未第時相與刻燭分韻厚章往往先成雍正甲寅 詔徵博學宏詞督撫學臣彙試

江南北士僅拔六人厚章與焉明年三月敦促赴徵車先一月卒年四十五母弟章字維益亦餼於庠恂謹能

文與兩兄並稱厚章子兆曾字耕梁姿稟過人不自檢束逾壯始折節讀書爲名諸生工詩尤長律體

○朱鼎謙字受谷爲諸生五十年雜學中祭酒嘗輯學庸思辨錄以章句或問語類爲主旁參蒙引存疑條辨精言匯參等書蒼萃儒先講義折衷至當學者宗之

○孫倪城字廣平父灝如艱於嗣官陽信時始舉子陽信告倪城地遂以命名少能文康熙庚子領鄉薦選徐州學正雍正庚戌成進士選庶吉士授檢討俄聞母疾卽請終養服闋充一統志纂修乾隆二年

上親試翰詹疾作致仕倪城宅心和厚志存濟物邑中低瘠田賦民苦賠累倪城嘗草條議會邑令丁銓入都卽

據以告諸當軸得核改下則邑人周崑同在志館纂修
歿於邸倪城經紀其喪緘遺橐歸其孤諸生十數人以
公事繫獄默爲營救得釋踰艾卒無子閭里傷之

○汪洋字萬育其先自歛來崑家故饒至洋已中落力學
嗜古尤長於詩入太學雍正乾隆間連舉博學鴻詞報
罷乃挾策走四方所爲詩益工海寧陳元龍長洲陳鵬
年序其所著碧梧軒詩行世子威鳳字聲離入太學亦
以詩名同時楊濬字瞻衡家苦貧中歲始補諸生能詩
工書爲長洲沈德潛所賞識後移居葑門卒

○陳葉筠字廷望府庠生論詩斷斷唐宋之分有近石湖
劔南者必排斥之時其目爲怪人中年僕被遊荆楚所

爲詩益工竟以坎坷終

○周昉字浚明後更名崑諸生原籍錢塘父太學璨多子
昉其第十三子也工詩善書法以虞楷參顏柳擅場一
時雍正間入都與寫藏經蒙 嘉賞尋分校一統志
間作山水人物花鳥及摹印頗爲時所重性孝友奮欲
以功名顯再試京兆不售卒於邸年四十八

○吳其讓字禮深祖母錢以苦節著其讓家貧力學晝夜
讀書常納足糲中以避蟲年十九補諸生尋受餼後以
貢入成均嘗營葬地於澱湖濱節衣縮食積三年始成
有姊適顧早寡給養之終其身生平論文最嚴擁皋比
幾四十年口講指畫一屏浮競之習卒年五十九編修

徐葆光序其文稿行世

○葛景中字運乘錫璠曾孫性純篤好學工駢體文服膺庾子山集詩學溫岐韋莊得其神味由歲貢官來安訓導以不善逢迎忤當道意鬱鬱卒於官其時工駢體文者又有李王佳字蒼助古今體詩有初盛唐人風格其燕臺送客詩最爲時所稱

○蕭狷字章辰庠姓張讀書不務章句之學泛覽百家喜考索文獻徵引人物尤究心志乘嘗著微顯志自明迄昭代凡孝子節婦之未表者隨所見聞紀之以副貢選授桃源教諭卒於官子孫遂家焉

○唐德宜字天申德咸弟爲文簡質不事藻飾居恆志存

經濟雍正間

恩蠲蘇松浮賦檄縣均派有倡爲儘荒

之說當事惑焉德宜謂若此則奸蠹叢生或借注荒勒索或移熟產冒荒窮民無力注荒實荒依然受累若履畝釐剔又必動搖斗則通詳達部經年累月莫邀實惠乃條上數千言呈之當事異議始息嘗著時務策二十八條頗爲切要乾隆元年薦舉孝廉方正以年老詔授六品頂帶德宜性孝友與兄德咸營先祠於瀾漕考定祭典俾子孫世守邑志失修已百七十年爲哀集掇拾成志稿若干卷又以坊刻古文艸善本悉心選錄成古文翼行世子六琦瑗瑩璩璋俱爲諸生有名琦出後德咸瑗字行立廩新邑庠瑩自有傳瑗子昭緒字

漢英性恬樸留意邑中近事隨手記錄克守遺澤云
○劉象春字香山祖漢星官保定經歷禱雨捕蝗頗著聲
績父湻懿有至性以哭母啜血死象春敦氣誼廣交遊
以諸生食餼尋入太學痛父母早世作罔極圖說索名
流題咏精鏤行世搜訪邑先哲困諸生者輯玉山人文
人繫小傳甫竣而卒孫應鈞字鳴韶幼刻勵向學詩古
文精醇博雅以高等生選拔入都連躋京兆試病歸卒
○徐衡字咸一樹庸子幼隨父之京爲父執張大受何焯
所器許登乾隆丙辰進士授濟陽知縣改補徐州教授
課士以勤敏稱年七十一卒於官衡舉鄉薦後因公車
二十餘年安分問學其教人務求根柢嘗主講蓮池書

院所甄錄率多取科第去子燦字康生中乾隆辛酉順
天副榜甲子薦經魁爲文綿密有法邃於易學著易範
通一書得溫公潛虛經失傳之秘隨父任徐州病卒燦
子祐字天吉謙謹有文譽以恩貢循例分發歷署南
匯無錫華亭訓諭卒年八十五

○徐凌雲字漢客幼病目年十四未了一經間聞伯仲讀
左史頗解大義竊搦管卽有端緒補諸生益肆力於古
究心經世之務屢躋棘闈遂杜門卻掃慮邑中人物久
湮闡幽摘微作先友傳又輯宗譜預修崑新合志耄年
猶秉燭著書乾隆甲戌冬折漕議起凌雲作對客問數
千言邑令許治見而嘉歎不果行凌雲性孝友家貧拮

皇朝詞林典故 卷三十一
據營菽水秘不令親知與兄有楨觀賓弟有鑑麟友愛無間存歿卒年七十四麟別有傳

○王之醅字學舒一字鶴書邑諸生世居生田里祖肇慶庠名升字來章幼孤事母孝能詩善書年未三十卒臨卒焚遺券數千金郡守陳鵬年爲立傳父蒼璧字躬玉亦能詩有隱德之醅幼受業於劉澤乾後師事長洲陳世治上海曹一士尋入太學試南北闈屢薦卒不售晚舉鄉飲以歿之醅熟於制義源流剖析至精評選有明迄國初文不下數十種皆風行海內詩亦簡淡有王孟風性愛客饒肝膽一時海內巨公如大興黃叔琳金壇王步青嘉定張鵬翀長洲沈德潛常熟陳祖范輩皆

折節與交臙舟過訪者相接德潛則主於其家最久者也子炳文字在中幼能文補諸生病瘵卒從孫玉墀字鳳翰父諸生嶠早卒玉墀力學自奮工詩尤精楷隸劬及摹印製硯靡弗深究性嚴毅有守生徒脩脯外雖一介不妄取也以歲貢終

○張誼字无躁雨時子幼雋異爲先達王喆生賞愛肄業紫陽書院長白鄂爾泰開藩吳中見誼古文詞目爲國士無雙館之春風亭優禮甚至素精詞曲後乃焚棄專意根柢之學嘗取自漢以來六經義疏網羅考索約眾說以參其是證以御纂五經務俾詳明確當而後已凡十餘年而成筆疑一書卒年七十子家相字默存

皇朝詞林傳 卷三十一
工詩文援筆立就乾隆辛卯成進士邑故有玉峯書院
久廢己卯歲新邑令康基田卜地重建屬家相督治既
成家相爲設法置生徒膏火田既登第當道延主院事
一時造就多知名士未及仕而卒

○王雲客字飛登家貧好學壯歲始青其矜尋餼於庠性
謙沖淹貫經史熟於古今掌故其訓子弟務崇實學故
及門率循謹無浮囂之習時與雲客並稱經師者爲顧
大慈大慈字衣士世力農十歲能屬文父令習穡事邑
士余純錫愛其才爲飲食教誨之學大進補諸生食餼
後設教吳淞濱門牆稱極盛王荃李世樞世望其尤著
也大慈沉酣典籍所爲詩古文雅合法度積資當充貢

疾作結跌而逝年五十六

○龔煒字仲輝遇仙翁漪之後進士相玉子少負雋才應
童試得而復失隸籍成均屢試又不售乃棄舉子業專
意爲古文詞規撫六朝駢儷體落紙累千言尤瑰麗可
喜妻爲太倉王氏雅工詩閨闈唱酬爲時流所稱煒所
著有蓼懷閣集巢林筆談等書子昭字受宣力學工詩
文有志操累薦不售以里選終

○陶澗字韻清補常熟諸生食餼雍正中歸籍新陽以明
經需次終澗幼嗜學病制舉家依倣形模不講義理故
其爲文簡古澹雅期於發明經訓中吳名宿如諸大文
王步青周振采輩咸推挹靡間言教授生徒多知名士

得其闔奧者爲同邑高華華字自芳明應天府尹啟裔
孫父諸生式亮字南耕工詩善書華少補諸生沉酣子
史百家詩文標新領異不逐時趨家故貧門人吳映辰
及弟映薇孤貧力學卻其贊慰訓甚至映辰兄弟卒以
學行著稱華季弟諸生榮尤以能詩著

○徐裕焜字梅遜明副貢殉義開宏元孫少負逸才善屬
文尤長韻語嘗著馬鞍山懷舊詩前後凡得百二十首
蒐羅鄉先賢軼事自爲註釋長洲沈德潛爲之序雍正
乙卯領鄉薦乙丑中明通榜授婺源教諭卒著有華乳
山房詩稿

○孫登標字在岡父諸生昇工寫竹登標少遊庠試輒冠
軍以選拔中乾隆乙酉解元丙戌成進士授福建海澄
知縣移疾歸方需次時歷主書院講席稱名師邑令許
治延課其子兆椿兆棠先後成進士兆棠中湖北己亥
解元主司吳俊訝其文不類三楚兆棠以從遊登標對
俊笑曰是誠得衣鉢眞傳者旣歸掩關理故業詩文益
斂華就實陶成多令器卒年七十六登標乙酉同籍魏
模亦自少能文鄉舉時年未弱冠屢因公車需次將得
官而卒模爲莊渠先生校裔孫字元植受業韓暢之門
吳郡中名孝廉也模得其肯綮文益工生平志行端謹
尤邃於易學教授里中多知名者

○顧愷量字萬陶明贈少保恂十世孫諸生易季子家貧

資脩脯養親刻苦力學夜無鐙油挂一編於籬落間月上誦百遍始寢爲諸生歷試高等學使莊有恭舉優貢入成均由官學教習授南匯訓導學宮就圯至卽設法興修又創建尊經文星二閣奉委勸諭掩埋捐俸葬其無主者內艱服闋補甘泉士從遊日眾丹黃甲乙矻矻忘疲以疾歸揚人士爲立碑頌之愔量所著詩古文馴雅有法族祖登重修邑志屬愔量主其事邑志自康熙中邑令董正位主修未竟愔量苦心哀集再閱寒暑始就文獻藉以不墜焉季子振甲字尹廷諸生以詩名

○徐柱臣字題客炯孫父修仁字用晦以鄉薦歷官普洱知府柱臣少贅丹徒張氏與妻兄冕同遊儲大文之門冕故美才有青山莊別業在常州北郭延攬江浙名流冠蓋敦槃之盛照耀一時柱臣天姿敏妙濡染旣久造詣益深詩詞瑰瑋淵雅書法得晉人風骨晚寓維揚跌宕詞場以老子春福字道庚吳縣廩生能以古學世其家從子嵩字錦堂父虎臣贅無錫顧氏嵩以金匱籍舉乾隆丙午鄉魁後更名鏐慶官蘄州知州嵩少具雋才工詩古文詞癸卯秋闈嵩卷已擬元以三場違式被貼主司謝塘爲刊其遺卷名益起公卿貴要爭羅致之嵩亦雅自負一官落拓竟以憂悴死

○陳桐字大年父治箴處士大同曾孫也慷慨好義陳恪勤鵬年開藩江左時嘗手書聲垂愷弟額旌之桐少從

顧大慈遊得其指授以諸生肄業紫陽書院院長沈德潛亟加稱許時王師平定準噶爾學使者命肄業諸生擬西郵永定頌桐作稱最名大噪生平邃於問學於漢宋諸儒同異是非之故多所闡發爲詩文雄厚典博力追漢唐性介特多迂僻顧喜留心地方事嘗於巡撫莊有恭新開吳淞江引河內鑿港通向書浦以便舟楫人呼爲大年港云

○徐德諒字尹達乾學孫駿次子少耽吟咏從長洲沈德潛學原本漢魏六朝而出入於三唐諸大家擬古樂府尤高騫雄邁妻長洲蔣氏素能詩花晨月夕偕子女輩互相賡唱極家庭韻事晚遊秦中足跡所經得江山之

助故其詩至老益工以諸生積餼充貢卒年五十二其後邑人杜羣玉輯五家遺詩德諒實爲之冠餘則顧鼐朱兆曾王飛藻唐洪緒也飛藻字懷青舉人歧武孫童年補諸生邑令康基田目爲國士延課其子以選貢入成均晚授睢甯教諭卒鼐兆曾洪緒並附見諸傳

○諸世器字景筠又字敬甫父如南能詩世器四歲時教以字卽私劈蔥葉擬書之點畫無訛年十五於羣經傳記應對縱橫不窮以諸生貢成均南北闈試十餘次卒不遇乾隆壬午車駕南巡獻賦召試已擬進

呈以小誤報罷生平篤志古學嘗東極海隅西走甘涼北遊燕趙所遇瑯亭旅邸中隨時記錄所著詩釋地一

書休甯戴震稱其考證明信不苟爲羅綴蹈襲他撰述甚富易詩三禮通義四書古訓其未定本也世器夙具至性厚於師友母嘗失明屏酒肉葷辛以舌舐者二年目復明待兩弟吳城葛廬以友愛著諸生沈方泰世器幼嘗同學者少孤力學能詩蚤世爲序其遺詩以傳所交多海內士皆推挹無間言卒年四十九子祖銘丐震誌其墓吳城字襄甫少負幹才父以家政委之旣析箸始銳志問學補諸生精制舉藝兼工詩鎮洋畢沉開府西安以書招之謝弗往葛廬字耕甫幼受學於世器偶試韜鈴爲弟子員非其志也與吳城並以詩稱於時

○沈啟東字岱瞻居張浦之棲賢里少嗜讀書而不喜舉業文字家貧課徒自給節縮衣食以購書力不能致則假諸藏書家手自繕錄於邑中故實尤反覆鈎稽嘗著馬鞍山志搜隱正譌多前人所未及又著張浦遺聞一書前賢軼事古蹟遺聞實賴以闡發焉

○戴溶字文江號竹山先世自休甯遷嚮城明初卜居崑山遂著籍焉溶爲雲南副使士傑六世孫父彥翀字協飛邃經史學溶幼稟庭訓長益發憤爲文章鬱律蒼健得國策文氣息年逾強仕始受餼喜摻求邑中掌故徵引家藏殘帙至志乘譜系就吳鏡可信錄詳加參攷別爲誌畧十卷會邑中比部李以健捐修文廟畢創舉洒掃會圖久遠溶與焉襄事恪恭始終如一卒年五十

七子二長傳震見菽術傳

○黃鍾字律陽幼負異稟有神童之目爲諸生名鵲起遊學靖江受古文法於新安程崑崙桐城方苞高弟也故學有本原下筆千言一衷之於義法生平潔白自矢讀書課徒門牆稱極盛晚以歲貢授阜寧訓導阜邑學官向分理民事資河潤鍾以非分辭課諸生如平時乞歸六年七十三鍾素工詩兼善書畫以縑素請者輒應之顧嘗自謂此非平生致力之地不足多也

朱兆麟字苑仁乾隆辛卯副舉性端醅培植後進首重立品所爲詩力追盛唐間著古文詞亦淵雅有法度並時以淹博著稱者爲周時照時照字象明明尙書倫八

世孫才思敏瞻作詩有奇氣嘗渡海得句云青萍一點浮諸夏終古何人極大荒可想見其氣槩積餼充貢卒

○孫岱初名之堂字子佩先世自歙徙崑之安亭鎮父光祖博雅能詩畫岱十四喪父哀毀如成人從嘉定張承先授經傳及唐宋諸大家文尤服膺歸太僕爲制藝意樸氣靜人必細繹久之始得其意理以是試輒不售乃益務爲該博之學上自朝章典故下及金石碑版皆攷據詳審尤勤於里中掌故輯安亭志歸震川年譜諸書至性過人季弟早亡過時猶泣兄性卞急事之終身無違言從弟被誣將繫獄力解之又收養族之無依者曰此我祖一身也母嬰未疾卒岱哀痛嘔血月餘而卒遺

命以衰經斂同時趙之璧字月帆居南鄉七橋村幼嗜讀書所爲詩風格在韓柳間秉性淡靜樂志詩酒以老
○杜綱字振三少補諸生有聲時經生家久不治古文綱獨上下百家於幽隱難窮之處輒抒其獨見發前人所未發童試時受知崑山令許治令與子兆椿兄弟同學後兆椿出守松江時時過訪絕未嘗干以私兆椿益愛敬焉所著有近是集同邑諸世器爲序而行之

○李璿字宗舜可沂元孫母宋故出吳門巨閱璿從伯母才媛凌雲女弟也雅嫻詞翰璿自幼耽吟咏補諸生後與同里丁潤王汝楫賡倡聯吟爲莫逆交客遊四方造詣益深所作古今體詩格律堅蒼無佻巧之習駢體亦

雅近六朝璿五歲喪父事寡母能盡誠家壁立館穀養母恆不給璿場厯營甘旨年五十二先母卒里鄰悲之潤字子如初名玉琳字儒珍新邑庠生父諸生宗固字若山學行爲鄉祭酒潤性簡淡工諸體書尤長於詩胎息少陵以神味勝爲前輩徐德諒所推許歷遊中州燕趙兩浙曾次愈擴晚乃芟薙少作自訂其詩爲璞存臆稿卒年六十餘汝楫別見玉潤傳與潤酬倡最久者
○徐傳詩字蘊存昂發從孫補郡庠諸生工時藝尤長於詩嘗著星湄詩話援引故實頗詳覈傳詩世居真義以地有落星石古蹟故亦名星溪從祖昇初與耆儒周奕鈞里人陳至言輯有星溪志略傳詩復哀集見聞作續

志里中人物多賴表揚以歲貢終奕鈔別有傳至言字
諤士布衣能詩工行草書

○杜羣玉字巨川父纘字松嶽有文學以幕僚攝雲南新興吏目忤上官罷在滇教讀者十年歸而養母課子族
郇稱長者卒年八十羣玉舉乾隆丁酉京兆薦授武邑
令夙工詩公餘與開州牧合浦李符清郵筒酬唱名聞
輦下有李杜之目憂歸梓同里徐德諒以下五人詩各
爲小傳以示來學論者稱其有古人風尚服闋補新安
令卒於官

○孫銓字鑑堂貢生麟趾子乾隆庚子舉於鄉以官學教
習選南匯訓導制府鐵保百齡愛其才相繼列薦授陽
信知縣折獄多平恕以失察典史濫刑罷官僑寓濟南
以卒年七十銓自少警敏力學爲詞章導源騷選嘗客
定邸 成親王見其詞翰禮遇甚優素工書秀勁入吳
興堂奧癖嗜前賢書翰搜羅薈萃手自摹勒爲壽石齋
帖行世間寫山水蘭竹亦復氣韻生動爲時所稱銓子
四兆蘭兆淮兆蕙超兆蘭字露香國學生候選縣佐兆
淮字自香幼負雋才隨父宦山左得朋友江山之助所
爲詩古文詞得盛名丁父憂歸與邑中諸先輩相切磨
學益進入胄監屢躋京兆試無意進取晚游西秦客林
文忠幕最久所著多散佚惟花牋錄鏤本尚存兆蕙字
笠江由陝西盩厔縣丞敘功擢任石泉鳳縣事母憂服

官表附錄
卷三十一
三
闕授雲南呈貢縣旋調順甯會回匪滋事失察鐫級改
補庫大使卒於官生平所至有政聲工繪事著有續花
譜載絕域異卉人間未見者藏於家超字灤泉由陝西
朝邑主簿洊擢安徽五河縣值粵匪滋擾皖北五河本
土城以失守罷嗣隨曾文正公襄辦營務克復黃陂敘
績保奏復原職旋積勞病歿

○李世瑩字冰壺幼警慧與弟世經並以諸生餼崑庠乾隆乙卯領鄉薦嘉慶元年 詔舉孝廉方正有司以世瑩應授六品秩平居手不釋卷疏證是非動中肯綮詩文馴雅有法世經字綸九以選貢試授湖南州判值逆苗跳梁巡撫姜晟延主奏贖世經素敏給羽書旁午

肆應裕如敘功擢授湘鄉令乞休卒於廡館世經子以峙字俊甫幼穎慧未冠補諸生爲詩文並綺麗隨父宦湘中游覽所至吟詠遂多著有古俊齋自怡草兼工駢體食餼旋入成均膺道光甲午科鄉薦未及禮部試病卒年五十五

○徐家綸字宣嘉直隸巡道炯曾孫崑邑諸生弱冠時潛心理學於周程張朱之書無不研究爲時文樸茂淳實薦而不售遂棄去益務爲根柢之學古文詞宗法望溪旁涉 國初諸家後以貧累客遊無所遇歸卒著有春秋年表

○石文燿字星槎家貧嗜學居崑之千墩而隸新陽諸生

籍每試輒高等乾隆戊申舉於鄉嘉慶辛酉成進士授內閣中書充 文淵閣校閱在京邸從遊甚衆多成名者積資當外遷疾卒

○吳棟字豫章自少刻苦勵學嘉慶庚申領鄉薦大挑列上等試令浙江累權縣事在湯溪稍久公暇進諸生講說書指如親子弟瓜代時紳士多歌詩以贈後攝黃巖甫抵任而卒棟性行醇謹爲文一宗先正詩筆亦淵雅嘗主講玉山所甲乙罔弗悅服云

○葛寅字穰芳又字樸存少承家學以詩名受六法於外父太倉顧太游又究心於籀篆之體年二十四補新陽諸生乾隆壬申加科中副榜得景山教習期滿授河南許州臨潁教諭己卯由教諭任應河南鄉試中式十三名舉人丁內艱服闋補太康縣教諭卒年六十五所著有樸存初集游燕浪語金臺游稿見素詩賦文稿留穎集樸存詩餘樸存雜著凡如干卷

○吳映奎字文驢少孤與兄映辰映薇互爲師友共夜讀母紡績佐之一夕課文各三首就雞三號矣母出餅餌分啖少息書聲復作其刻苦如此映辰字翼南性方嚴燕居無惰容盛暑不裸露與映奎同貢太學臨終自言有車從來迎著有味經草堂詩文集映薇亦崑庠生映奎學問淵博工古文詞通六書尤精譜學著有望山閣詩文集顧亭林年譜九峯三泖攷竹西小記崑新合志

稿卒年六十八子元錫字果生崑廩生力學敦行兼工
寫生得元四大家筆意以諸生老元錫弟純錫字廣齋
後改名良濟亦崑廩生嫻邑中掌故修志時與分校爲
人慎默寡言持身儉約與元錫俱未及貢卒與映奎分
纂崑新志者有邱以澄張宗城以澄字瀛帆宗城字藩
之皆貢生

○翁義山字蟻亭新陽庠生世居真義中市性穎敏過目
不忘藏書千餘卷悉誦之尤研心於字義韻學自號航
頭學究著作甚夥其從孫智錫集其詩文及字學考義
凡數十卷道光初邑中修合志悉心採訪不濫不遺卒
年七十餘同里趙元傑字翼亭崑庠生性好善嘗作文

以勸弊俗人樂誦之又有勸孝勸善文嘗集王聖教序
自寫懷抱琢對天成工妙無比卒年五十歲

○余應魁字攷益崑庠生博學能文客授陽城湖濱從游
者皆有聲庠序屢試省闈不遇杜門養志以著述自娛
卒後女孫希嬰檢其遺稿有冗餘草一卷子夢星字酉
巖崑庠歲貢生應省試四薦不售乃棄舉業攻詩古文
詞旁及素問青烏星平卜筮等書作行草圓勁古樸家
貧而好贍族有嫠而無子者留養之年六十三方授旌
德訓導不及赴而卒遺稿散佚女希嬰得其吉羽草一
卷夢星子希煌字詡齋少從姊希嬰授句讀卽能通大
意補弟子員名噪庠序間爲人貌和性介與人接吻訥

然言不能出諸口與希嬰及從兄希焯相唱和劇論漏
五下不休體弱善病年四十遽卒著有愍石山房詩鈔
四卷同邑潘鐘爲之序

○朱鈞字鎔萬乾隆己亥舉人博學工文尤善書嘗值

內廷三館隨 上臨雍獻詩 賜綵緞白金屢薦春官

不售有貴人愛鈞才欲招致之謝不往時崑新會館寓
楊忠愍公祠同人新忠愍像欲得鈞髯然皆不言鈞慨
然曰一代偉人得爲其鬚幸矣竟難與之旋以方畧館
校理得知縣未幾病卒遺稿多散佚存者竹醉生吟藁
四卷

○杜履亨字文剛父早歿母李教之成立李名筠工詩邑

中稱女史者也履亨性方嚴規言矩行喜獎誘後進爲
根柢之學晚貢成均卒年五十九弟泰字凝一新庠廩
生爲文英偉倜儻與履亨俱連薦省闈不售暴疾卒弟
謙字允孚府庠廩生剛正嚴毅嘗寓居大墅鎮有方士
自浙來創爲祈斗煉丹之術謂服之可成神仙百里內
信從如雲男女雜遝謙曰是將興大獄矣告邑令逐之
他縣果以教匪事株連至數百人焉先兩兄卒年四十
六

○顧佐堯字玉懷幼穎敏讀書過目不忘經史百家外汎
濫於岐黃王遁及二氏之書無不博洽賅貫爲文風發
泉湧如不能竭者中乾隆乙卯副榜年七十七卒平居

未嘗一日去書案頭筆五色俱備每一披覽朱黃滿額
上事親孝母與妻偶有違言遂獨居室內相逢俛首過
不交一語妻以是鬱鬱卒友愛兩弟出入必偕及弟佐
禹卒遂不復應試性不耐世務家故業賈父卒時室有
錢七百貫主計者納其鑰卽挂戶上喪畢啟視烏有矣
竟亦不問也嘗與同宗國政省蘭及佐禹諸人刻武陵
八子詩所著有叢綠軒詩草弟佐禹字翌元自少卽刻
苦於學夏夜懸帳席地置燈其中漏四下始休辨色又
起旣游庠名噪甚從游者半邑中所作文酷摹選體古
聲古調閱者至不能句讀以是試輒被斥詩亦苦索得
之不肯涉淺近一語嘗有山氣清於韋柳詩句同人傳

誦焉竟以攻苦致疾年三十六遽卒

○李存厚字懋和號未菴世望孫以健子生五歲隨侍祖
京邸天姿穎敏讀書過目不忘時外舅昭文吳熊光開
藩保陽存厚留甥館八年因入冑監再應京兆試不售
預內廷校錄居輦下與諸名公鉅卿游聲益起旋入
爲光祿寺典簿進本寺署正外舅去督兩粵存厚乃歸
丁父憂居喪一循古禮事母顧先意承志撫季弟教養
兼至修文廟創洒掃會助舉普濟育嬰堂歲飢出粟平
糶設粥廠以飼飢者凡橋梁道路諸善舉無不竭力爲
之其學於六經諸史外汎覽百家工詩古文才思敏捷
對客揮毫千言立就尤長於儷體著作甚多隨手散佚

所遺卧樗子詩文集八卷馥餘吟草二卷亦燬于兵卒年五十九子德郊字又庠號序卿父存厚督課嚴延名師朝夕講貫故德郊學有根柢補弟子員餼于庠舉優行屢試省闈不第援例得訓導旋丁父艱遂無意功名徧游浙東西臨川李閣學宗瀚昆明趙少司寇光先後視學浙中延襄校閱去取公明浙人稱之主崇明瀛洲書院一歲歸道光壬寅夷陷上海邑中戒嚴德郊募義勇嚴巡防民以不擾繼父志於邑中善舉無不盡力生平容止端嚴見者生憚所著有兩漢撮要六卷小瑯環館駢體文四卷古樂府一卷其竹二分軒吟草二卷選入崑山詩存年四十八以心悸病卒德郊次子傳鉞幼

子傳嶠並死粵匪難別見忠節傳

○張觀瀾字于海崑庠廩生先師事吳門彭二林究禪乘之學既問業於同里汪愛廬遂專力程朱於四子一書窮年研索博綜漢唐宋明諸家講說益以並世師友諸論及己所心得融貫而折其中積三十餘年始成名曰四書集解同郡吳雲石韞玉序而行之又有蒙齋文鈔十卷亦皆闡發性理之文歿後其子成幹哀輯所成者成幹字倬堂道光辛卯科舉人

○潘鍾字彥林少善病既游庠屏去鉛槧閉戶習靜數年病愈心精煥發下筆千言渾浩流轉蕭山湯文端視學吳中拔置第一文端旋主秋試謂其卷於三禮未精抑

之鍾歸專精力學者十年道光壬辰文端復主江南試
首題與於詩三句鍾用禮記詁題次題旅酬下爲上用
儀禮三題食之以時二句用周禮次藝房考不能句讀
文端搜遺卷得之遂發解先是辛卯應試渡江見江邊
浮棺鱗次鍾亟募資埋之至是人以爲陰德之報鍾於
三禮皆有劄記晚年修揚州府志去取詳審士林稱之
子秉淳秉淵皆諸生早卒從姪寶泉字鳳郊邑諸生精
制藝工詞章肄業郡城紫陽書院爲山長朱宮贊珩賞
拔文名益噪屢應秋闈試不第年三十餘賣志卒

○張潛之字彥孫少孤貧母吳氏紡績撫子夜漏數下不
休潛之坐母足下睡醒輒以餅餌與之寒暑習爲常旣

就傅穎悟異他兒沈靜寡言獨居一室過者不知中有
人也補新庠生屢試秋闈不遇潛心理學以鄉先哲朱
孝定爲法早起讀孝經一卷近思錄數章居母喪一遵
古禮喜爲詩與同縣吳以暢王鳴鳳何顧復趙元春張
經邦結櫟社相唱和道光戊申酉陽蔡進士世佑來權
新陽事相契合延主留養江北災民終事無失所者其
明年大水潛之說新陽令徐敬安出常平粟門啟飢民
入掠遂大闕忌者歸咎潛之且布流言相齟齬潛之不
自白謝事去鬱鬱發病卒年六十一性喜談忠烈節孝
事表前明孝子陸安暨妻鍾烈婦墓修陳忠烈公淮張
烈愍公振德祠晚又編輯國朝崑山詩存三十二卷

錄版行世其自著勿庵贖稿十二卷漫稿四卷晉史談
三卷西鹿城舊事詩二卷婁曲鴻爪吟二卷東國竹枝
詞一卷子鈇字壽翼崑庠廩生父疾焚香籲天願以身
代母病適赴省試聞耗遽歸到臂和藥進母立痊居喪
哀毀骨立嘗作二十四孝試帖詩寶山邵某梓入勸孝
書中卒年四十七以暢字曉人性高介不與俗人往還
刻苦爲詩炊烟久絕不顧也以貧卒年四十七無子所
著有秋聲書屋草甲巷吟稿鳴鳳字仁符新庠生天才
奔放性傲睨嗜酒不拘小節嘗夢升雲端有人瘞己軀
於梅根昭文蔣寶齡爲作梅根瘞骨圖後應試卒於都
所著甚多同里顧培刻其一草亭稿顧復另有傳元春

字毓萬父康能詩元春承家學詩品近劍南其持論甚
嚴謂袁枚絕詩止三句人莫解也所著曰來鶴軒稿經
邦字粒園崑庠生工詩所著多散佚僅存粒園吟草八
卷

○何顧復字育震佐堯子出後舅氏遂冒何姓少豪邁喜
飲酒其於制舉文不屑爲也應縣試令得其卷大喜將
置案首爲有力者攫去明歲以縣第一游泮喜爲詩初
愛明七子繼摹劍南晚歲喜長吉集嘗讀書千墩鎮歲
暮歸過吳淞水膠舟時督學姚文僖試松江府回適並
泊文僖聞小舟中誦聲琅琅使問知諸生邀入舟飲酒
談藝三日別去臨別囑他日往見笑應之然亦竟不往

也道光壬寅暎夷訶海上縣中一夕數驚居民多遷徙復獨曰此不足慮也夷舟巨而江路窄若由吳淞入火礮不得施是自敗也彼循鄭孽故智由崇明入江吾恐今世無郎廷佐梁化鳳其人者乃不數日夷鯨入江之信果至年五十八卒所著有舊雨來齋集少時嘗與張潛之吳以暢諸人刻櫟社七子詩舊雨來齋詩

○張景煦字孟昕父喬棟喜藏書景煦少穎敏恣意瀏覽於列代官制河渠鹽漕荒政皆能窮究其源委補新庠生性好山水而體苦羸弱每出游藥壚茗椀到處相隨及歸積詩盈寸晚築室三楹顏曰眠琴窩王學浩爲作圖董觀察國華作記名人之至崑者輒觴詠其中彷彿

顧仲瑛玉山草堂勝致詩尚性情其佳處在香山劍南間著有眠琴窩吟稿四卷卒年六十子序均字禮庠精算學著算書十餘種晚歲家落以醫術自給咸豐末避寇卒於鄉

○龔雲瑞字蕃康號凌霄崑庠增廣生父邦彥爲經塾師講明句讀考訂四聲譽重一鄉雲瑞幼稟庭訓遊庠後館郡城少司馬宋鎔家宋故多藏書雲瑞發篋被覽貫串箋疏之學既館淞南得顧亭林先生遺書益肆力於考據每試經解爲提學使者見賞文章原本經史詩賦取法唐宋而能運以沈博絕麗之詞門下士多取科第入詞林者所著經解編韻說文訂正稿燬兵燹惟文集

梓行子逢辰諸生見忠節傳

○潘基泰字韻樵世居楊木橋家本農而基泰好讀書從張潛之游得其指授爲詩古文詞益工潘道根深器之題其齋曰何事蓋取讀聖賢書所學何事以相勵也後居室爲粵賊所燬藏書燼焉基泰鬱鬱卒年五十

○吳以辰字雲甫少嗜學受業於武進李申耆先生北洛其與友人論易以爲虞氏專言互體於易豈無偶合而不免穿鑿附會京房以卦氣言易推人吉凶休咎若前知者然而漸流於六壬遁甲方伎之用夫易之爲道綱紀治教經緯萬端古聖兢業之心以之祈天永命固不出乎此不幸而遇時屯否則亦身任天下之重使之亂

可治危可安史記云伏羲至純厚作易八卦子長此言必有所受之也若以京房虞翻象數言之小知害道者多矣孔子有加年學易之歎或謂祇從修身言不知吉凶消長之理進退存亡之道固統乎天下而言者也伊川作傳專言理不襲先天諸圖之說朱子言祈禱卜筮皆古聖所作至孔子而後教人一決諸理不屑屑於冥漠不可知之間所以建立人極之功於是乎備觀於易之十翼可見朱子此言讀易之方也咸豐朝兵事起各督撫令民自相團練以辰論之曰孝友睦婣任卹聖人教人善其鄉黨者平日無教急則驅市人而使之戰勢必至土崩瓦解飢饉之害先及貧者寇盜之禍先及富

者今則人人懷利以相接官與民二心貧與富二心所以釀此巨災也無仁讓之心以勇先人而能待寇盜之至者吾不敢信也以仁讓之俗有禮之鄉而不能待寇盜之至者吾亦不敢信也可不慎思所以先後哉其後粵匪至團練果不足恃著有固谿漫稿積餽貢成均卒

○徐楫字懷祖司寇乾學四世孫涇縣典史乾隆戊子秋蝗晝夜力捕倦憇古廟假寐恍見八蜡神偕一黃巾異狀者來請罪至夜蝗皆抱樹死愈以爲誠感聖誤歸侍八旬老父傳軫教養弟及子姪輯家譜修先祠置祀田纂祖父遺集喜吟詩善書畫兼及岐黃術著有小舟吟稿對峰書屋畫譜年七十四卒子寶誠字實善崑庠生

能擘窠大字性誠篤行止端方寡言笑家貧授徒自給課暇則閉戶自精足不入市交游絕少人亦鮮知之者年七十二卒寶誠之從姪名徵麟字秉均新庠生受知學使湘潭周系英擬拔貢成均系英卒不果游歷皖楚不遇歸而授徒自給丁內外艱及兄嫂喪不以貧廢禮晚年庭植花卉評藥養病有石高數尺莓苔遍體爲司寇惓園故物輦置墻隅卷簾靜對喜爲詩蕭疏淡遠如其人咸豐癸丑粵匪陷江甯積憂明年病卒有次石山房詩稿四卷

○朱元理字惕庵陳墓鎮人年十六補新陽學諸生唐進士洪緒字以女後就婚山東滕縣與桂未谷諸人相唱

和唐卒歸其喪賣宅代還官逋三千金家益困幕游山左及徽歛聞又以外家羣從多廢學者歸而教授遂不出卒年六十一長子銘有雋才年十七入邑庠早卒元理詩久散佚其從孫培源輯數十篇顏曰惕庵贖稿

○支鳳岐字梧邨世居張浦里補府庠增廣生從長洲姚浩遊工書法性尤孝家貧以館穀奉親甘旨無缺卒年七十餘子登萼字籥堂崑庠增生性直品端自幼勵學文宗清眞雅正年六十餘卒登萼子是基字賓臺幼穎慧有大志遊庠後屢列優等餼於庠鄉闈不售絕意進取是基子南薰幼工書能擘窠大字補諸生早卒是基撫孫葵成立遊庠亦早卒是基卒年六十餘又鳳岐族

姪孫廷珍字省三少孤勵學爲文精悍補諸生旋餼於庠中年棄帖括業肆力於古文每構一藝朋輩爭相傳觀年三十四以瘵疾卒

○錢體仁字少塘崑山安亭鎮人幼耽經學習族祖大昕宮詹書爲文章根柢深厚中道光甲辰舉人已酉大水倡捐五百金任賑事鎮與嘉定界毘連咸豐三年土匪滋事體仁團鄉民捍閭里嘉定令欲上其功於大府體仁懇辭之七年大挑選授六合縣教諭阻於寇不克赴寇耗益逼憂憤成疾臨卒與親友訣別合掌趺坐而逝年四十三

○魏宗夢字雪江新陽庠生居眞義鎮家貧廉潔自勵奉

母撫弟孝友備至嘗續先輩陳至言真義志未就別撰
青衿譜一冊人繫小傳凡西鄉之爲學官弟子者皆列
焉卒年五十餘弟宗薰字養純府庠廩貢生性爽直喜
面規人過同治丙寅郭中丞柏蔭奏開劉河宗薰任新
陽工役事課最以訓導薦未幾卒年五十七

○張星鑑字問月序均子幼姿穎慧觀書過目不忘遊庠
後不屑習制藝肆力於古文攷據經儒訓詁之學淵博
宏深壯歲遊京都援例貢成均累試不第先後爲四川
學政李德儀安徽學政殷兆鏞湖北學政洪鈞河南學
政費延釐訪延襄校稱得士心折漢儒河間獻王及許
叔重擬請從祀孔廟疏乞吳江費太史延釐錢唐汪少

司成鳴鑾奏於朝得 允旨光緒三年知崑山縣金吳
瀾興修邑志延司協修未逾月而病中風尋卒年五十

九

○傅鈺字韞石新邑增廣生性至孝母病篤鈺割股和藥
進母食獲瘳與青浦許錫祺同里吳以辰及從弟春江
爲道義交以詩文相切劘詩格雅近韋孟有翠巖山館
集已梓從弟春江字岷源新邑諸生隱居馬澤自號馬
澤釣人喜吟詠有馬澤釣人詩集

○徐家疇字禹九廣德知州傅一子幼隨父任甫髫齡傳
一歿於任隨生母凌扶輿歸里凌教督嚴攻苦無間寒
暑遊庠後家漸落藉授徒奉母甘旨屢應省試不售志

不少曠晚年甫氣於庠性耿介常面規人過不少假同
治初元 詔舉各州邑孝廉方正當道以家疇薦固辭
獲已爲古文渾灝流轉高祖秉義培林堂未刊文集編
輯累年積館穀以付劄光緒丁丑崑邑宰金吳瀾興
修邑志延司協修家疇平居留心文獻披拾成帙於藝
文選舉表冢墓攷諸類採纂綦詳己卯秋志未蕝事遽
病歿時年七十一以歲貢終

崑新兩縣續修合志卷三十一終

崑新兩縣續修合志卷三十一

隱逸

唐

史德義崑山人咸甯初隱居虎邱以琴書自適或騎牛帶
瓢出入郊郭東京號爲逸人高宗聞其名召赴洛陽尋
稱病歸公卿皆賦詩餞別德義亦以詩留贈天授初江
南道宣勞使周興表薦之徵赴都詔曰隱士史德義志
尚虛元素履貞確謙沖彰於里閭孝友表於閨庭固辭
徵辟長往嚴陵之瀨多謝簪裾高蹈愚公之谷博聞強
識說禮敦詩順禎期而捐薜帶應休運而解荷裳粵自
海隅來遊魏闕行藏之理斯得去就之節無違風操可

嘉啟沃攸資特宜優獎委以諫曹可授諫議大夫後以朝散大夫放歸

宋

王僖字康國居太學有聲鄉人謂之王學正識與不識皆尊敬之有堂名逸野日遊適其中讀書自娛其持身治家甚嚴鄉里率以為法從孫葆自幼知讀書僖之訓也無子王氏舉族祀之不絕

姚申之字崧卿天姿雋爽少負遠畧登隆興癸未進士時樞密使張浚銳志恢復視師江淮而湯思退等力主和議申之以相臣不和難以抒志遂高隱不仕築別業於吳淞江上題其亭曰水雲千頃與范成大為忘形交成

大嘗為長歌贈之

龔昱字立道明之子少遊侍御李衡之門蔚有文學安貧樂道人稱龔山長嘗編樂菴語錄崑山雜詠行世所居曰栖賢堂陸游劉過皆為賦詩

范良遂初名之傳字次卿放情山水不慕榮利長於歌詩兄之柔雖貴視之泊如也卜居車塘自號墨莊居士子慶家建康府通判

元

盧觀字彥達其先龍興武甯人五世祖來平江徙崑山祖鑑字明叔工詞賦

盧熊為其姑作墓志敘其先世稱鑑待補進士

父有常字元

吉以隱約終觀自少刻志於學受業於湯彌昌錢重鼎

客遊江淮間當道多欲薦之力辭而歸隱居教授接人弗以貴賤異或以非禮加之怡然不較平居事親盡孝勇於爲義暮年得疴羸疾猶手不釋卷凡經史禮樂百氏之書下至醫卜小說多細書成帙勉飭子孫以讀書修行母卒以病不能服喪痛慕悲號病日增劇卒年六十五門人私諡夷孝先生子二熊熙

衛富益涇裔孫嘗負笈從金履祥許謙學謙以齒齊望均不敢當北面禮富益盡傳其學謙卒爲之制服決意不仕常設壇祭文天祥等三人觀者墮淚隱居教授不入城市卒年九十六門人私諡正節先生

顧權字伯衡其先婺源人父達卿始居崑山初達卿與胡

居仁同里閉心敬慕之期有子當使爲士及生權見其端重岐嶷銳意教督少長敏力學業不以祔寒盛暑少輟博極羣書尤究心於易里中子弟多從之遊爲人不事矜飾哦詩酌酒頽然自放然與人交久益恭敬中年刻意爲文章有古作者矩度遭時喪亂竟窮而死年不滿五十無子知州僕侯斯教授蔡基爲營葬馬鞍山北殷奎銘其墓門人私諡靖夷先生

李季高號蓉月性慎謹博洽羣書與衛培同以隱德老於林下郭翼嘗謂二人者儒碩德典章老成皆表表楷模師儒之宗也

余曰強字伯莊其先福之古田人父與可爲武夷書院山

長來居崑山日強少孤盡力以養母母歿日夜涕泣終其身如初喪於書無所不讀尤務精析經史為文辨博宏雅追古作者既卒門人稱之曰淵默先生

金至善字伯明居澱湖之陽修德樂施老而益力於學教導鄉里多所成就自號菊逸老人

張師賢字希顏世業儒好古博雅善談論喜作樂府居婁東名所居曰芝蘭室四方士大夫過其地無不造之圖書列左右有欲得者即持去無所顧惜也

文質字學古居婁江之上學行卓然詞章奇放嘗與楊維禎挑梅花燈夜行維禎命賦一詩立就有歸來踏遍橫斜影吹落東風不見痕句為維禎所稱年九十六卒時

邑中耆儒盧觀趙天祐衛培盛德瑞范天與文質共六人有司月給廩以贍之

馬麐字公振世居婁東其祖遷吳淞南鍾巷里築室鑿池有田園花木之趣左經右史遇佳客往來則觴詠不輟與世泊如也楊維禎深器重之稱忘年友

明

呂誠字敬夫邑東倉人後隸太倉博貫經史精楷法尤工詩東倉俗尚侈靡獨能去豪習事文雅名士咸與之交家有來鶴亭梅雪齋日與同邑郭翼河南陸仁倡和其間邑令屢聘為訓導不就卒老於鄉楊維禎題其詩曰蘇支邑凡六獨崑山多才子魁出者往往稱呂袁謂誠

及華也翼仁華並別有傳

易恒字久成斗元曾孫性簡澹洪武中嘗應薦至京以老辭歸卜居淞南之大泗讓家貧不給處之泰然闢地數百弓引泉藝花竹自號泗園叟興至輒吟嘯以自適

王明善字復初自號樵玉性剛介矩步祥視動有令則隱居授徒教律嚴謹時兵火之餘人鮮知學明善爲之倡百里之外負笈從遊者幾千人一經訓厲咸有成立年七十六卒

范能字仲能淞南人少從毘陵謝應芳遊精醫善吟尤工書法永樂十五年詔修縣志能與盛頤等編纂成集上之被徵至郡以母老辭歸日以詩酒自娛不入城市卒

年八十餘門人孫俊字叔英其先由華亭徙崑山澱湖之濱俊讀書尚友尤工詩性愜樸不慕聲利晚別築草堂於磧溪之南自號南溪遜叟所著詩葉盛爲之序沈方字孟舟父真以醫名方清修好學積書數千卷皆手自校讐樂談性理惡聞釋老酷好陶靖節詩喜法書名畫視世務澹如也嘗遊京師爲執政楊溥所禮重及卒溥表其墓子三愚魯訥別有傳

朱璫字庭儀儒學提舉彬元孫父衍字宗海行誼推鄉祭酒世居儒學坊璫少從王明善學尤精易春秋隱居授徒教法甚嚴性剛正向人不作側媚語弟子前後相從者千餘人室隘不能容至設席庭中以處之人稱素菴

先生論者謂師道之立明善後一人而已長子昊字景和亦以名德著鄉里次子旻昊子斌並見前傳

沈愚字通理方之長子博涉百氏以詩鳴吳下宣德間與劉溥諸人稱金陵十才子其詩清美圓熟尤長於古風善行草曉音律詩餘樂府傳播人口或勸之仕不答業醫授徒以終其身慕宋劉龍洲行誼輯其遺集暨宋元

名人詩文曰懷賢錄年六十九卒子僕出為弟訥後子為長洲劉原博溥東甌湯參將允績海寧蘇秉衡平弟秉貞正崑山沈通理愚西蜀晏御史鐸慈溪王柏原進長洲鄒御史亮儀真蔣主忠弟務本主孝戚里王善甫貞慶吳人徐德重震共十二人亦作景泰十才子沈魯字誠學愚之弟嘗應試鄉闈以被髮跣足為恥即棄去工古文詞閱博豪壯一時稱作者凡巨室貴族碑版

之製多出其手制行修潔居家孝友篤倫理重風教以春秋指授學者巡撫周忱下車問政郡守况鍾贈之金力辭不受間與斯文社韻語稠疊意興高遠年七十四卒子存字元謨景泰丙子舉人城武知縣

虞震字啟東祥之子父卒家無遺貲僦屋以養母性高介不樂仕進兵部尚書余子俊舉為本部司務以親老辭母卒居喪盡禮讀書工詩自漢以下詩人辨其體制工拙悉當其所作務關風教自號長春散人家有遺書手自勘校至老未嘗一日離几案子臣

朱夏字日南永安子刻志勵行不求仕進喜作詩尤精書法負氣尚節有祖父風家藏法書名畫及先世手澤多

散夫夏力購完之討論先世遺集爲家乘十卷又摹刻
所藏睢陽五老圖傳世又封鬱林墓於陽抱山以識曾
祖德潤遺事授徒講學師範卓然巨族爭延課子弟晚
歲與甘霖沈魯諸人爲斯文會繪圖紀盛年七十一卒
尙書吳寬表其墓曰清修隱德之碣子文

龔琚字彥中理同母弟性好施予遇死喪憂患傾廩倒篋
無恡尤善藏書有以書售者雖高其價必購之日婆娑
萬卷中能盡通其說築安晚堂當風日晴美曳杖行歌
飄然有林下風里人高之稱竹莊先生孫震

張翼字汝敬性簡質嗜學通春秋累試不售卜築馬鞍山
東麓授徒隱居日對巖岫哦詩不輟與戚軒爲莫逆交

衣冠樸雅里人慕之稱東巖二逸軒字宗軾杜門教授
所居杏林書屋竹籬瓦鐙簾幃楚楚賦詩簡淡有陶韋
風孫學字汝積以貢分教開封遷東原王府教授

周恭字寅之博洽羣書爲詩古雅典則甘貧養晦授徒市
藥以自給時與高士沈周輩談論古今以士風民俗爲
念性嗜梅年四十始得數畝之宅環樹以梅自號梅花
主人縣令方豪欲見之力辭不赴豪書鹿門二字以扁
其居所作八哀詩盛行於世長洲吳寬題其後子可立
字必禮以貢官鄒平王府教授性剛直篤於孝友孫世
昌嘗修崑山縣志知縣申思科爲序而梓之

龔乾字敬法理之孫喜讀書不屑爲制舉義世父紱戒督

之則取諸牘謬簽應制家名字摘槩伊吾不輟實則所誦非所督也以是名不隸學官籍而雋聲彌噪友人朱希周顧潛表爲駙馬賓客辭曰麋鹿野性終在長林茂草間大冠若箕何與吾事耶去隱江上終身不入城市沈本初字大中幼孤力學居家嚴重有法詩有韋孟風小楷絕類顏平原時稱二絕許關分司鄭主事延爲義塾師以鄭不迎謁卽辭歸大學士楊一清被徵欲載與俱賦詩力辭後復以幣強之又辭年八十餘卒

陸郊字子野邑諸生世居雞鳴塘俊邁力學祖天秩以贊雄於鄉至郊家日落晨昏不給不顧也與武進唐順之海鹽錢薇爲文字交薇嘗雪夜訪郊室中乏卧具遂藉草爲榻清談信宿以去嘉靖丙辰直指尙維持訪人才於華亭莫如忠如忠曰有陸子野者詩類孟襄陽書類顏平原人品類王孺仲真高士也直指遂折節過存殓之行館郊葛衣芒屨上坐不讓人兩賢之年止四十四臨歿呼其子應陽朗吟王維詩且曰他時毋溷刻吾詩古名家流傳無窮者多不過二三十篇餘皆書蟬木蠹無益也周復俊嘗序其集

顧培字起元恂孫志行高古善寫竹兼工篆隸楷法尤喜吟詩諸父兄弟皆貴顯培獨家於東城安貧守志以終孫祐字德延瓊子博學卓行善讀書工古文詞與人交不立城府所居不戒於火家業蕩然僦屋授徒或日不再

食晏如也邑令楊逢春禮請鄉飲以足疾辭

龔一德字允咸漢陽通判承恩孫淹通經史教授自給生平不窺官署不涉市門侍郎顧章志欲延之家塾辭曰野人冠服粗鄙出入高門雅非其志歲儉都運王三接餉米亦不受邑令樊玉衝簡爲都講又力辭之玉衝奇其行邀以賓禮見一德遂去終其身不復入城

沈宏先字開之其先嘉定人避倭亂徙崑山宏先與其子徵憲仍以嘉定籍補諸生宏先爲文歷落窾窾不顧世眼卒以此不遇宏先亦自厭去間爲詩抒所自得旁及繪事山水草樹煙雲人物筆墨閒放如其人喜引掖後學嘉獎善類人咸敬愛之所居古屋數椽老樹一株宏

先蒼顏白髮挾書卷婆娑其下客至則劇談古今成敗事自號獨樹老夫 國朝順治乙酉城破出走爲兵所及徵憲乞代乃舍之而徵憲被殺宏先更與兵遇被數創得不死居一年鬱鬱以卒徵憲死事別有傳

沈夢星居千墩鎮善詩工書法名在公卿間隱居教授泊如也與徵君陳繼儒晚年稱莫逆交徵君筆墨半出夢星之手卒年八十二又衛卷字匪席流寓青浦自號昌亭餓夫有哀其貧而裹飯食之者拒不受游陳瑚之門每一相思輒呼僮擢孤篷徑訪性好游非方外士不交有詩傳若干首見離憂集又朱以甯字建侯自號雲仙子家淞南謝去諸生殫心著述至老不輟與同里張康

侯晉共矢遜志

國朝

○朱尙字柔中楸元孫負經世志於天文星歷地形要害諸書無不洞究言災異輒中明崇禎十二年詔求直言尙赴闕上六疏具陳治兵足國諸策當事抑之以兩疏聞其一發關稅弊有旨質問罪以鑿空構難錮南城絕食七日俄就勘濟甯轉發淮口兩遇寇被傷仍返濟上是獄起閣臣薛國觀持之頗急國觀賜死其黨魏藻德繼枋國政莫敢釋尙後檄歸侯命則京都失守矣乙酉後去爲僧號明智乙未秋卧疾七日告衆而逝子肅

○張立廉字鴻一魯唯次子少好學工詩古文有聲復社

明崇禎丙子領鄉薦性倜儻好義與兄立平敦善不怠尤工詞翰鼎革後削髮僧裝以自晦有強之仕者託廢疾堅辭博綜教乘著述頗多嘗集乙酉後殉難諸紀錄爲玉峯完節錄八卷各系以贊子端韶字闇臣諸生入太學以文名於時

○夏世臣字永侯高祖縉字廷瑞助築崑山城明嘉靖壬戌恩貢以肥城令遷太僕寺主簿祀鄉賢世臣幼孤母茅口授經史未冠應邑試冠軍補諸生城陷時與母及妻王同赴水世臣獨浮沈四日不死時方主邑中許氏許全家被禍惟一子飲刃未殊世臣亟爲醫治撫養俾成立與門人朱用純並絕意名場以性命之學相勗勉

遇母諱日輒涕泣不食卒年八十用純作長篇哭之
○陸世鑿字彥修安吉子長身戟髯書卷外無他好尤熟
國家典故及經世之學明崇禎元年以選拔入成均十
二年領鄉薦出莆田余颺門福王時颺預銓衡邀令受
職世鑿婉辭不赴惟以奉親課子爲事乙酉冬遇劇盜
被創幾死後有勸赴公車者輒託盜傷自解布袍櫻履
遁跡湖濱放情山水詩酒以老

○王榮字偉長在公孫十歲喪父嶽卽能述先事累牘連
篇佩服母教鍵戶讀書經年不出初婚時母忽惡其婦
婦無大故戒勿近遂終身異室明崇禎庚午領鄉薦癸
未授仁懷知縣值世變不赴菽水盡歡有孺子色工行

草亦能詩屏居荒野足跡不入城市卒年六十八

○張紀字齊方振德子少爲諸生明天啟間以父死事廢
北京錦衣衛中所正千戶未補聞都城變盡鬻其產至
南京圖報稱乙酉後披緇蕭寺自署僧名曰昭節更字
閨生號蘊菴弟緄字稚龍隨父赴蜀旣遭變與興文諸
生王垣團練義勇斬叛招降敘功上聞授緄都司僉事
辭不就崇禎四年扶父櫬歸補郡諸生遭世變棄去更
名潛字寄餘生平爲善惟恐人知卒年七十八

○魏文心字子元一字友繩庠之曾孫自幼力學守世業
秉性耿介在南雍二十年人不知名明崇禎壬午舉於
鄉年六旬矣一上公車不第卽隱居湖濱不入城市躬

貴新兩縣續修志 卷三十一
耕自食著蓑笠操舟唱吳歌問人曰吾竟無異農人耶
對曰無異則喜或言猶有似士人者則大愧自訟不已
配申氏卒申之族子某新登甲科來弔閉門拒之族子
不得已焚帛於田間而去年七十三卒

○陳蘭徵字猗之少爲諸生明崇禎十三年忽棄去有別
業在吳淞江西茅屋數椽清池環之橫一木爲渡常數
日不下自號曰西莊好讀書工詩善琴詩在陶白之間
喜畫梅雅自矜貴不輕酬應人生平與朱集璜陶炎最
相善晚年足跡所至惟招提道院或偕溪翁山衲坐荒
村孤冢間仰天歌呼人不知其何謂也

○李嘉慶字完素郡庠廩貢生明崇禎中舉德行又舉鄉
飲介席乙酉之變遷居江村以老

○歸莊字元恭昌世子爲諸生博涉羣書落紙數千言不
止性嗜酒攜酒應院試且飲且書日未晡成七義分隸
篆真草書五經文字御史元煒怪而黜之惜其才旋復
焉順治乙酉六月縣丞閻茂才攝令事下薙髮令士民
不從譟於縣繫茂才莊白衆殺之遂嬰城守事定後新
令究前事莊亡命薙髮僧裝稱普明頭陀隱居鄉僻後
乃廬金潼里先墓側生平最善顧炎武以博雅獨行相
推許而俱不諧於俗里有歸奇顧怪之目詩古文墨
竹無不工尤善書壯歲所作行草直逼兩晉以酒至者
長牋短幅揮灑不倦往來江淮浙水間輒奉先像以行

遇令節諱日采藻東芻以祭晚年校正曾祖震川文集
付梓傳世折衷諸名家持擇頗精卒年六十一兄子玠
字安蜀磊落能文不屑爲投時技以歲貢終

○朱述善字長庚陳墓人早孤旣長席葦卧母側母病一
夜數十起明崇禎末司理倪長珩權府事童試拔第一
補嘉定諸生以志節自許乙酉八月妻周氏死於兵述
善祝髮依萬壽菴僧舍號明菴里中高其義競遣子弟
從之遊嘗於亂定後蒐采鄉僻殉難婦女成貞烈傳一
卷幽潛賴以弗湮卒年四十四門人私謚孝節先生

○吳元冲字函白先世太倉人父泰行業醫徙居崑山元
冲幼讀岐黃書精其術已而父命習舉業補吳縣諸生

試輒高等有故人子以官逋借其妻受傭值於人元冲
稱貸贖之順治乙酉避兵南郭買地一畝縛茅編椽誦
讀其中甲午當入貢學使者檄之不赴喜吟詩蓄名琴
坐竹林深處揮絃竟日不倦尤工書法迻逸多姿得二
王風骨邑令召之醫不往就醫者填咽於籬落間後寢
疾家人進藥却之以苦茗滌腸胃不食數日卒

○顧葉墅字季皋諸生國變後棄妻子之徑山爲僧築精
舍數楹爲棲止地芒鞋布衲嘯歌松石間以老子宗眉
字白公宗麟字石公俱諸生

○顧蘭服字國馨紹芳從子以諸生入太學才名著一時
明亡後棄儒業永歷稱號南中遣使授冠帶招之辭疾

不赴遁跡田野究心醫理以濟人嘗承其父紹芬遺志捐千金建石梁於浦上名曰證願子巖字大雲好學工詩少遊太學嘗作落花詩百首傳誦輦下後南遊閩楚兩粵詩筆益進妹壻徐昂發爲序而藏之

○方南龍字豈潛鳳元孫事母能養志不使知貧弟通糧繫獄破家營救之爲文出人風雅尤工詩明季補諸生鼎革後野服幽棲日與同志倡酬論文爲樂性耿介絕不與熱客往來年八十二無病卒

○顧紆字子嚴同應三子少負經濟才明亡後絕意仕進隱居千墩舊廬居喪哭過哀目遂盲秉性耿介兄炎武講學秦晉間屢徵不赴紆寓書益相砥礪甥徐乾學兄

弟勢望方隆紆獨養高自重華陰王宏撰稱其間修於不見不聞之地不愧隱君子子洪慎字汝嘉試成均得州倅以親老辭歸從父炎武卒於晉走三千里扶襯葬祖塋承遺命以子宏佐爲炎武殤子詒穀後性愛客就所居西偏疏泉壘石與故人嘯詠以終宏佐原名世樞字復呂更字榮緒年十三補松郡諸生長洲何焯跋其文勉以繩武年未二十病瘵卒弟世棠字思召以諸生入太學喜蒐羅先世手澤以長子炯詩爲宏佐後構遺清堂儲從祖炎武遺書俾世守焉

○唐節字與鳴其先上海人後遷安定與其友楊湜刻意爲詩宗法漢魏三唐補郡學生益留心經濟明崇禎末

走謁南大司馬史可法參預軍務北都陷節亡命四方約共起義會福王立乃獻中興十策多切中時病當事者格之不得上同縣徐開禧謂可比之陸贄李綱國變歸土室蓬戶三旬九食自號雪巖遺老年七十二作偈辭世而逝所爲詩天啟間鏤板行世兵燹後無復存者○徐開任字季重應聘孫爲諸生有名避地婁東與吳偉業唱酬切劘明亡後絕意進取益肆力於詩尤專史學本朱子義例輯明名臣言行錄前半則增損於葉鈞元徐東湖之書中葉以後徧採國史野乘手自編次貫串精核於門戶邪正好惡是非確持所見不爲苟撓餘姚黃宗義稱之曰近時僞書流行此錄出庶幾收廓清之

功歲舉鄉飲禮邑令前後凡三請終謝却卒年八十五當開任時羣從門第聲華甲天下而開任獨淡泊如寒素年雖耄潔己好修論者以比古逸民焉嗣子履愉字民懷恭敬孝友爲名諸生早卒孫世濂世溥樹庸

○王如潛原名之濟字甫瞻邑諸生父鍍字維度明末與陸世鏞同創義旅世鏞亡命鍍亦幾不免如潛周旋患難遂棄諸生常乘小舟往來吳越間作浮家圖所著詩曰天涯集同里朱用純爲之序卒葬陳墓

○梁逸字逸民辰魚曾孫徙居吳縣紅葉村時同邑張辰家閩門外湖州濮宗新安汪子蛟並寓吳四人以詩相友有遊山倡和集逸歸崑後刻所著詩仍以紅葉村名

志所樂也間爲篆刻古樸得秦漢遺意甘韜晦不輕詣
人年八十六卒無子葉方藹輯獨賞集稱其五言古詩
神味淵涵冲乎自遠吳爰論詩最嚴嘗贈逸詩有頽唐
我恨淪天寶疏越君能起建安之句蓋推服至矣

○金遜字仲宣六歲而孤潛心力學受餼於庠事母孝娶
婦不甚得姑歡喪偶後遂不娶或諷之答曰未能養志
焉用妻且長兄有子不爲無後矣明亡棄儒冠披緇授
徒見鄉里無告者卽以脩脯與之旣老寓居僧舍歲庚
子題偈於壁無疾而逝蘄州顧景星稱爲有道處士

○顧沖初名浩字季宏祖存信自太倉遷邑之六橋沖少
孤侷儻有大志汎濫羣籍尤棲心內典薄視一切世好
教授嘉定傍海之鄉惟以讀書行善爲訓與人無競所
作詩平淡真率近於康節擊壤之作喜遊山水足跡徧
吳越年六十五臥疾作辭世偈投筆微笑而卒

○葛麟字毅調錫璠第六子父喪哀慟毀瘠幾至滅性補
長洲諸生與同志訂析疑社討究書史昕夕無間順治
乙酉後絕意仕進隱居北郊點閱全史四載甫畢喟然
歎曰上下四千餘年興亡得喪盡在是矣乃檢閱梵典
置筆於傍有得輒錄年七十二卒

○陶甄字康令炎之子明崇禎十五年補諸生父殉難後
遂棄去授徒以老間賦詩鳴琴自娛亦通禪學與葉方
恒相善方恒官山左時甄兩往訪之一登泰山一謁孔

林皆有記有詩自詡爲虛往實歸也卒年七十三

○葛芝一名雲芝字瑞五錫璠孫鼐之子爲人沈靜英敏年十六補諸生時太倉張溥張采負天下望芝則溥之壻采之高第弟子鏃名礪行文章擅一時先達及當事皆折節與交芝夷然不屑也渡錢塘訪史孝咸求所謂致良知者明亡後益潛心學道徧叩知識閉關參究己入山盡屏家累獨栖一室竟日瞑坐亦時移室往妻張頗知元學能辟穀長洲徐枋爲立生傳

○陳仲達字升之順治乙酉夏唐王入閩仲達以薦爲幕府參贊分守瞿山條陳數事切中時要後歸隱淞南古梅花地自號三遊老人與世謝絕卒年八十三

○奚濤原名冠字沅山一字大蒙其先有宗晟者始居崑隨勦島賊備知海船利弊鄭若曾籌海圖編有水戰水操策半引晟語五傳至濤性豪壯頗類晟明崇禎五年補郡諸生遭世多故習射講武散千金產欲有所爲已而志不伸遂棄儒冠隱居渭塘與四方任俠者遊日吟詩作畫詩出入高岑王孟時有黍離麥秀之感畫有倪元鎮筆意嘗自言身雖卑不敢忘羞惡貌雖弱不可干以非義有子四人不令讀書或問故則云是非能立志者讀書必不安貧賤愚之所以人之耳卒年八十六

○呂天裕字日甫少孤貧母辟纊不足供兩人食命就食於叔叔不可乃往依圓聚僧舍僧延師訓之年十五有

客僧自少林來奇其貌授兵書一卷并刺擊之法母歿
傭書富室徹夜誦讀通經濟與朱集璜陶炎友善疏九
州方畧并邑中利弊上邑令陳祖苞祖苞奇之爲援例
入成均順治乙酉糾鄉兵守城城潰被俘天裕鐵面虬
髯諳北方語給帥曰家世遼陽後徙都下作客至此帥
試以武藝接雙刀運動如飛雪帥喜欲用之天裕請至
都稟父母而受職及渡江乘間遂逸遇前少林僧復授
以元門秘旨并神醫案宏景方等書天裕歸隱於醫所
入頗饒不屑生產惟周貧濟困爲務叔生一女曲爲周
之年七十一自知時至沐浴趺坐而逝子熊

○周楫字元珠補嘉定諸生旋受餽明亡卽棄去改名鐸

字漢仙所居吳淞之湄有軒三楹曰學圃雜植果蔬自
給足跡未嘗入城市與歸莊金俊民訂忘形交尊酒相
對每悲歌長嘯欷歔泣下年踰七十卒

○劉嶠原名文泰字心逸先世籍長洲祖曙明崇禎十六
年進士除南昌知縣未赴國變殉節死父葳字御蕤以
生母陳爲勝蓮菴尼來省遂壻於崑之朱氏家焉嶠三
歲喪母十八喪父依其外姑成立每念怙恃悽然神絕
又追維其祖殉節事或中夜悲吟或走山谷間徘徊浩
歎遇諱辰伏臘哭泣竟日如初喪少時迫長者命一應
童試旋自悔責不復預家貧訓蒙給朝夕間爲詩歌以
寓感憤搜緝其祖詩文鈔板以傳寫山水高雅疏澹嘗

探咸巫山歸語人云我由大江溯夷陵望夔門瞿峽諸
奇勝凡山川回突雲霞變怪皆我詩情畫筆也

○孫大登字于魯先世徽州人其祖始居崑山大登少工
文章孰吟詠學使者課士兼試詩賦大登卷最上補諸
生非其好也尋謝去康熙丙戌 車駕幸江南同人

勸赴 行在獻詩不應所居東南郊外疏籬短牖甕無
宿春晏如也工八分書得漢人法詩律尤穩細有力者
招之輒謝弗往獨與王喆生爲道義交卒年六十餘

○程丕纘字維新崑山葦葭浜人少讀書中年棄舉業入
太學習襟豁達志趣高雅慕顧德輝倪瓚之爲人宅旁
擴其基址手創園亭雜植花果竹樹疏泉疊石檐廊繚

曲頗極幽致題曰玉山佳處小獅林延孝廉周蕙田爲
西席主其家二十年嘗招詞林郭麐李錫恭進士周宗
元學博李錫瓚諸名士飲酒賦詩其中肴核之豐意誼
之厚賢主佳賓極一時之盛著有小獅林詩草行世兼
工繪事至老不釋從弟丕烈崑庠生有夙慧善舉業文
不加點敏捷如風晚年長齋奉佛以終

○潘道根字確潛明殉節諸生康侯六世孫父湯盤字商
珍性剛直爲新陽縣吏不取非義財家貧如洗嘉慶中
夏縣李汝棟知縣事憐其貧命掌賦不就又命司稅答
曰辭十萬而受萬是爲欲富乎汝棟頗敬之道根少穎
悟不願爲舉子業長從邑前輩王學浩吳映辰映奎游

崑山縣志卷三十一
天
研究經史旁及說文音韻之學肆力爲古文詞邑有詩社曰櫟社道根與焉周流授徒兼習醫資生計晚年學宗程朱私淑先儒顧亭林朱孝定故所造益粹徧搜鄉邦軼事補入志乘輯崑山先賢冢墓攷又與張潛之輯崑山詩存梓行生平篤於行誼待弟姝有恩早喪妻不再娶教子以義方談及忠孝節烈事輒涕零明孝子陸安墓地被侵佔白當道修復之王烈婦含冤久失其夫之名格於例不得報細訪得之俾邀旌典業師陶鎔無後歲時致祭精醫理病者延之卽往貧者卻其酬或轉給之插架書滿皆手自校讐聞善本異書必借錄副本日腫腕脫至老不休人歎爲不可及咸豐元年保舉孝

廉方正作書以四不可力辭八年七月卒年七十一

東

葉裕仁有擬卓行傳

○李蓀字蘭芬崑庠生授徒餬口不爲科舉業好搜羅明季軼事晚年專修淨業於殺盜淫三戒持之尤力在崑館張浦許氏最久後卒於吳郡其著述不知歸何人者碩

明

周壽誼生宋景定五年甲子至明洪武六年癸丑年百有十歲蒲圻魏觀守蘇州以孟冬之吉行鄉飲禮於郡庠賓僕之外又特位三老人其一卽壽誼次爲吳縣楊茂林文友皆九十餘形神充足行坐有禮越五日壽誼還

崑山觀躬出叟門外再拜以饑時以得見爲幸太祖嘗
召至闕廷賜以酒饌復其家又六年而終子孫多壽考
者後人名其堂曰世壽裔孫震自有傳

張潮字思信祖士衡父元鶴皆以行義爲鄉黨所重潮少
從仲父翔學嚴毅雅飭尤精於書隱居教授未嘗輕出
邑大夫歲舉鄉飲一至城郭與石璞邵魯生同里閭鄉
稱三老璞字元素性蕭散不羈善吟詠所著多關民風
禪世教者居大瀟浦東清溪茂樹映帶茅屋課子孫耕
植其間晚年喜畫山水竹石意致閒放卒年八十八魯
生字師聖少受業於龔詡力學自樹晚築春水草堂吟
嘯以自適潮子璐字德輝以歲貢任永康訓導

葉春字景春元義士苗元孫父明字敬明充鄉正理賦役
隱德爲鄉人敬信春襲父業益務爲善鄉里故人李文
彪託以義孫馬添壽託以子女三人皆貧不能自存春
俱撫字之爲之婚嫁並給以田宅後有背德者則曰彼
垂死託我我教未至耳奚責爲爲作詩自儆嘗於歲暮
代人輸逋賦其人償以敝器春旣完飾其人見而生戀
春卽返之性喜積書建家塾延師以教諸子及里中子
弟嘗曰爾曹所行不悖於書足矣次子盛登進士第或
謂庭訓所致曰吾兒豈待督責耶苟能自奮人可爲也
後進聞之多策勵自立者卒年七十

唐汝爲字文谷學務該洽不名一經其教因材而篤隨授

直隸河東總督修志 卷三十一
隨解史學書法一課俱下士大夫家競相延致晚歲實
飲於鄉左右服勤皆一時譽髦士林榮之

毛弼字惟忠先世自河南徙邑之太倉生平寡欲慎身嘗
拒鄰婦之奔家貧以所受先人田讓兄至鬻其居而僦
屋於人子昇長能孝養昇卒復就養於孫優游桑榆逾
五十年宏治辛酉年及百歲巡撫彭禮立坊表之孫澄
支劭字克強少好學博洽經史早喪父事母吳至孝白首
承歡溫顏愉色嘗築春暉樓以奉母與顧恂姻婭友善
時稱二老子寬字汝發亦以孝稱

顧恂字惟誠父良字士良居雍里嘗讓產於兄士賢獨身
居約久乃大殖旦入城市多攜錢施貧乏者恂性和厚
爲吳凱館甥益修父業力行善事痛母早世不逮養觸
事賦詩與夏景沈愚爲忘年交倡和成卷吳瑞嘗稱其
詩溫柔典則類其爲人居家以孝友勤儉訓子孫鄉里
咸矜式焉年八十八卒子式宜之鼎臣宜之號自如天
性孝友尤喜賑恤不殖貲產晚益充夷與邑中耆宿張
汝舟高以政輩結社飲酒賦詩以終

徐良字子忠世居邑之季巷貌癯眇一目服田力穡而外
絕不與外事性嚴正里多狡獪無賴子遇良輒引避值
社日椎豕大饗推良上座良每教其儕曰人生在勤不
勤則匱一旦饑寒迫身悔何及耶聞者率改容服化卒
年八十子昊字德克幼贅同里高氏充里中賦長和厚

不與衆忤長貳皆優遇之業稍裕乃奉父母居城南晚
尤好施予里有鬥爭多方勸譬誠勿輕投訟牒吳子申
王詒字資學元崑山知州安貞五世孫世居邑之藤蘿涇
祖鼎父玠俱以義俠聞詒性質慤不暱人是非嘗於縣
門前拾遺金數兩坐待至暮愀然返凌晨仍候之有徬
徨怨泣者詢之卽失金人也悉數還之姑之女爲都昌
王妃姑暴卒親屬爭分其橐詒惟取一海貝語其子曰
吾取此者恐拂人意耳母之叔陸榮家富無子以田產
僮僕造門授之欲得詒子爲繼力辭不受訪其宗屬爲
之後二子秩稷旣筮仕必一詣其署誠之曰貧乏是好
消息也平居徒步布衣不感二氏說膺封至四品章服

僅於拜命日一御而已卒年七十八秩自有傳稷字惠
叔成化丙午舉鄉薦自麗水令累官象州牧少時以兄
爲師友恭至老無間卒年六十九

周果字世高居同邱里爲諸生力學嗜古時尙科舉業果
獨究心性理諸書性嚴恪對客終日無惰容嘗銘其座
右曰寸心不愧鬼神隱居教授出其門者多所裁就參
政周大禮按察使張憲臣皆其選也晚以齒德賓於鄉
卒年八十六

李棠字述卿光祿丞謹孫少業儒因病輟業習醫術家貧
好施予多儲藥以活貧者歲饑道遇殍而未殊者扶歸
養之迨復故聽其去如是至再三嘗自郡歸附舟者竊

其橐金去或勸跡之則曰跡而得之彼何以施面目哉
置弗問族姓有與爭墓旁地者中棠以危法尋得白既
而其人父子暴死棠遺其孫金命葬之所爭地且築室
以居之鄰有惡少伺棠避島寇入城掠其藏而火其廬
亦竟弗窮治邑舉鄉飲不赴卒年七十八子同芳

朱景運字際甫夏曾孫父希陽字懋功官兩浙運判有幹
局告歸晉階奉議大夫景運好學有文爲從父希周所
器許就諸生試輒高等久之不第以太學選授浙江按
察司知事時兵燹甫平餘氛未靖諸曹多唯諾受成事
景運獨參伍便宜條上之試輒效嘗隨慮囚使者讞獄
景運多平反使者心是之舍己以從有以美妻故陷爲

盜者獄久不決景運訊白之民以爲神遷廣州府經歷
旋乞歸居山南賓玉堂經歲不窺戶後生輩無識之者
獨故人謝紹慶張棟歸子慕時相款接邑令樊玉衝雅
重景運造請賓席出語人曰不意今日得見三代以上
人年八十三賦詩謝故交端然而逝

李魁邑七保人力田自給性敦樸不識城市萬曆甲寅年
百有二歲有邑諸生周之從至其里物色之歸告邑令
延致賓飲魁神明湛然一時觀者塞路又諸生俞子義
字和卿居甫里家赤貧事親以孝稱晚年葬親因廬墓
側年八十九與其妻同日無疾而逝

歸有禎字養素父年六十一而生有禎年甫十八卽爲人

師二十父歿居喪哀毀得嘔血疾補諸生後秋闈每以疾歸遂棄儒習醫日久精其術治多神效性和厚耿介長兄死以所遺產盡讓之次兄及姪率庶弟居宅之西偏迨兄姪輩俱窘困仍賑卹之歿爲棺殮從兄有光亟稱其賢年九十無疾而終

周憲字奉萱楊莊人敦至行萬歷中邑令王時熙表其廬曰淳樸高風又天啟間諸生陸振先字培菊年八十餘舉鄉飲又諸生戴士倬字伯章以薦授訓導舉鄉飲

陸安吉字叔時善事親或暮歸親已就枕必屏氣立寢帷外聞欠呵則就問訊兄元吉早世珍襲遺編每訓課諸姪恒至泣下萬歷間歲大祲族人搶攘富宗門得給粟富宗重安吉踵門餽堅却不受而遇災獨顛連者百方簡括賑之子世鑿登賢書誠之曰吾願汝常體認孝廉二字以郡守陳洪謐推官倪長珩列狀保薦授光祿寺署正國變後杜門晦迹髮膚無損間爲吟詠輒焚棄卒年八十三長洲令李實私諡孝靖先生

顧其康字錫之世爵崇明千戶高祖廷用贅崑山因家焉父元泰字觀巖有名諸生間性長厚不喜聞人過其康藉脩脯供甘旨年五十棄諸生明末督學朱國昌以賢良薦授浙江松陽學博不就嘗誠其子曰我一生不求人知不因入熱又曰不愧屋漏勉焉而未逮也卒年七十八子瀛秀字玉書 國朝順治辛丑進士

○周鏊字濟伯大禮元孫明萬歷末補郡諸生家貧授徒以養父母性端厚言笑不苟 國朝順治五年克里選不赴廷試借族弟誌隱居自適陳溪人聘往講學析蘭擢絲多先儒所未發兩舉鄉飲卒年八十三誌字嵇仲暨其子藩字念功潤字玉栗皆以孝行稱

○朱名佐字允恭本徽國文公裔明成化間歲貢生瑄始遷邑之金莊名佐其六世孫也早歲喪母楊家貧遊學質遷竭歷奉父甘旨或顏色不懌即市他物進待父妾袁甚敬庶弟妹婚嫁悉盡心力妹適華亭陸氏以兵燹夫婦來崑授宅分困無德色舉鄉飲賓卒年八十七孫

承別有傳曾孫樂英字斐傳以國子生議敘州同知雍正癸丑乾隆乙亥兩遇歲饑首先輸貲以賑又創建崇善堂於錦溪掩埋暴露骸骨卒年八十

○顧錫璇字徵泰允諧孫父天職早卒母王課督甚嚴補諸生授徒自給性剛毅每行道中目不轉瞬拮据營先人葬力植寡姊弱弟從兄錫疇深器之有事必相訪福王時以恩貢當授訓導不赴錫疇歿家法漸替錫璇獨毅然負荷為族姓楷式舉鄉飲賓卒年七十三

○王志守字元允三錫曾孫咸亨子明崇禎己卯鄉舉國朝順治初授巢縣教諭性廉介課士敦實行齋廚索然歲餘謝事巢士餽遺堅辭不受卒年七十七志守與

嫡母兄志宏志密志審母弟志密稱五俊志宏字元度明萬曆戊午領鄉薦官德清教諭志密字元爽志審字元夙俱諸生志密更名浦珍字元璣明崇禎間補長洲諸生失怙後絕意功名或勸之歎曰雞豚弗逮存萬鍾奚為也卒年七十八志守子祈鞏字固生康熙乙卯舉人上元教諭志審子元臣字聖乘以青浦籍登康熙庚戌進士官會稽知縣

○朱高原名是字去非顯宗從子幼力學蘊於庠順治乙酉城陷負父母泗水避難贖舅之子以延母族祀康熙初以恩貢廷試第二需次州佐不謁選造就後進多顯者尤敦勵風教歲時祭享必詣祖墓拜跪不以毫

老廢禮年八十餘卒子朱普字冊韓少遭喪亂逾壯始讀四子書補諸生生平言動必以禮與朱用純勤探宋儒理學為後進師法者四十年以歲貢終其後有李宗顥用純弟子也服習師訓行慤言端亦為士林推重
○張應聘字慕江居張巷以庶孽幼孤諸兄挾高貲不之卹應聘能自勵竟以貲雄於鄉性喜施予至老益篤卒年九十盛符升嘗作八十壽序稱其孝友信義甚悉
○陳用牧字子司其柱次子明崇禎間以諸生充貢太學國變後絕跡名場姊少寡無子歲時祭享命子孫世其祀家貧喜賙恤窮乏座客常滿生平不蓄婢妾不校非禮七十後舉鄉飲神明如少壯時年八十二無疾而逝

子昌會初名南金字有筠餼於上海庠嘗手輯先世譜牒詳覈具本末卒年七十一昌會子雲龍字象乾諸生入太學能文好善卒年七十九

○顧升輔字伊仲鼎臣六世孫幼失怙恃育於嗣母潘十歲依外家許氏讀書明季補諸生國變後謝儒冠隱居教授間事篆刻秀勁工整嘗哀輯先世家訓為雍里世德錄修纂宗譜孜孜罔倦性介特不受暮夜金不喜言人過舉鄉飲賓卒年八十七同時諸生楊起虬字雲翔舉止端方雖酷暑未嘗裸體卒年八十二歸子裕字元祉明亡棄諸生非力不食舉鄉飲賓年七十餘卒

○夏元圭字景初事父暉以孝稱弟元璧同居友愛至老

無間性耿直是非不苟遇兄弟參商者必委曲調解有世族子贅宦家盡析父產於諸弟元圭聞之登堂拜其夫婦又有曹玠字鹿野者厚嫁其兄女亦往拜之意在揚善以勵俗也明末補諸生旋謝去舉鄉飲賓卒年八十九子均字秉卿邑增生以嘉定奏銷呈誤嘗割左股以療母疾倡建育嬰堂殫力二十年不倦均子乾御○方蕃字接三以諸生入太學早孤事母孝撫恤孀姊尤至內外親屬困乏者多賴以舉火凡設粥施飯給棉掩骼諸善舉力行弗倦舉鄉飲年八十餘 詔賜冠帶屏絕人事焚香藝卉自號息夫以終

○周奕鈞字韓錫邑諸生性坦直無城府機械家賓曦門

外父寵愛馬鞍山之勝寓居山巔華藏寺奕鈔每雞唱必入城詣寺同寢食卅十五年無間喜考訂邑中故實至老不倦嘗輯馬鞍山志及星溪志畧援據稱詳覈又嘗分纂邑志年八十與鄉飲子振邵字昆莊工制舉藝爲名諸生婦朱事翁以孝稱乾隆丙子並染時疾卒

○顧耀字瞻百居干壩里爲諸生六十年耽精制舉義理法兼到蕭張紳作微顯志邑中孝子節婦耀與諸生凌虞弼採訪之力居多卒年七十八

○徐傳軫字子轅乾學家曾孫九歲能詩甫冠補諸生由例貢考職列優等未授官歸在都時有同鄉人鬻子作歸計者不忍訣而號傳軫遇之惻然罄橐中金助之贖

俾孥子同歸坐是困滯京邸數月終無愠色晚與族子

凌雲纂輯宗譜未竣而卒年八十二

○陳德深字御章本邑中名族徙居甫里習計然術性端謹非正人弗與遊不苟取于鄉黨有緩急曲爲調卹家漸落好善如初晚年尤喜與人言孝弟事卒年八十餘

○朱湯孫字祖依肅之孫補諸生後卽講求經世之務遊歷齊魯嶺海所至爲當道倚重晚歸里與唐琦孔傳泗諸耆宿爲老人會杯酒流連繪圖爲樂卒年七十七湯孫性孝友慷慨好義有遠年僕出厚貲請贖身湯孫卻而焚其券僕感泣去

○周嗣發字震平尙書倫六世孫康熙乙酉領順天鄉薦

皇朝詞林續修名志 卷三十二
屢蹟南宮念父母春秋高侍養承歡不復出性慷慨好
急人之難晚歲陶情詩酒年七十八卒兄學易字此巖
癸巳舉人與嗣發稱二難姪羽儀諸生亦以能文名

○葛正笏字摺書一字信天銅陵教諭世隆子少入太學
隨舅氏徐樹屏視學粵西識桂林陳宏謀於諸生中宏
謀自爾垣出守招正笏往司筆札泊厯藩臬秉節鉞所
至必與偕宏謀表正風俗振飭吏治正笏參贊之力爲
多性端謹有膽略宏謀敬禮積久弗衰尤工書法得褚
河南李北海兩家神髓刻有仁聚堂法帖行世卒年八
十三

○李桓字欽武性孝友肆力古文詞尤喜學歸有光乾隆

己巳重修邑志桓任分纂以諸生貢成均卒年八十

○李愔字典五居千墩里父緝熙字生洲善寫山水兼元
四家之長愔少篤內行工爲詩一以抒發性靈爲主不
屑規仿前人生平與物無忤里有善舉率先倡導至老
不倦以附貢生舉鄉飲旋以次子世望官封中憲大夫
卒年八十三子六世樞世望世仁世楷世濟世震俱以
文名世樞字鳳詔乾隆乙酉副貢世望自有傳世濟子
以鼎字玉傳嘉慶辛酉選拔貢生以謙別有傳

○李方靖字介臣其先世有善行方靖繼之家稍落不少
愴惜曰吾非博長厚名先志然也少從陳省遊爲詩文
原本經史不落餽餉獨恥與時輩競名以諸生積資充

貢選丹徒訓導逾年乞歸卒年七十八

○孫麟趾字素徵雍正四年分設新陽麟趾首補諸生旋受餼乾隆辛巳以 覃恩貢成均爲文章體源騷選一歸馴雅小試輒冠曹家貧以教授自給簞瓢屢空處之晏如持身嚴謹雖盛暑見客必具衣冠抵掌論文上下古今得失歷歷如數家珍卒年八十三時同庠之士先後以耆宿稱者有唐琳周開先葛鼐琳字敬銘德咸從子乾隆甲子副貢嘗主玉山書院講席培植後進諄復不倦晚授靈璧教諭乞歸卒年八十五開先字梅占和定先生耀曾孫爲文宗法先正師範嚴肅鼐字景葵少受業於麟趾能文有守兼工岐黃術與開先俱以里

選享老壽終麟趾子銓別有傳

○邵銓字履南少習舉子業不售改習孫吳家言補諸生居城北渡橋里生平熟於史事論古今人物具剗解書法歐裴晚歲猶矻矻臨摹不少休閒試軒岐術輒驗然不喜競名恥談利達事卒年七十九

○朱繩祖字亮武系出明宗室萬曆間高祖某幼遭家難有姚太監者攜之至崑因冒姓姚後復本姓繩祖性行醇篤人無少長必推誠相與孝事寡母喪妻後不再娶侍寢侍膳不暫離夙善鼓琴閒時澹菴焚香撫弦發響有翛然世外之思母湯壽踰百歲繩祖亦八十餘時稱人瑞

○王國良字嗣叔父墳爲名諸生國良少與諸兄弟師事進士陳嘉炎稱入室高弟性樸質無城府教後進一以植品守分爲務卒年七十六時與國良先後同庠充貢稱耆宿耆爲徐成志王琳成志字念先性謙謹不與戶外所作制義膾炙一時教授生徒最有法卒年七十二琳字耀昆明應天府丞執禮八世孫少孤貧母蔡資紡績佐讀琳苦志自奮名日起居恒耽研經史議論古今得失犁然如指掌卒年七十三國良弟國瑞字貽素少補諸生喜搜羅百氏有得則劄記之天性任真樂易卒年八十

○葛常旭字孟暘明太常卿錫璠七世孫山東候補經歷

峻道子新庠生讀書勵志操家貧授徒館同里方氏郡中汪氏最久教人先務本而學文爲餘事故游其門者皆束身寡過規步繩趨嘗作日省編日鑿錄及家訓自勉以勉人晚年舉二子有兆基兆訓之曰爾等皆於身所需要好適口要好章身要好起居日用要好獨不要立品居心之好此孟子所謂不知類也豈知最好者希賢希聖他卽不好吾何損焉素好行善夜有偷兒入室覺而燭之則相識者家人叩之終不洩其姓名人歎爲厚德弟常盛監生嗜學好古旁通醫術常盛子綏兆少穎敏讀書日百行補崑庠生遂於經義試輒高等亦教授爲業食餼未及充貢卒

○沈贊侯更名文英字約齋崑山籍居郡城秉性樸實自奉儉約產業雖饒而出不乘轎衣不求華食不務精身素康強一切家政必親操延師教子弟必誠必敬先師食而後已食道光三年大水災爲普濟堂董辦公晨出暮歸寒暑無間雖高年必步行賂資五千餘金知府額騰伊給樂善引年匾獎勵卒於道光七年十二月年九十三

○朱銓字倫甄明成化辛丑進士南御史忮齋孫父元載諸生銓少嗣族父廷煥後家貧授經洞庭東山迨疊遭本生父母及期喪念門祚衰遂入都肄業國學兩試北闈不售時總憲竇光鼐閣學翁方綱太史張問陶皆

器重之招致幕下復念嗣母春秋高乃南歸未幾嗣母卒喪葬盡禮爲人孝友待孤寡恩誼兼隆見善身爲邑中如水旱助賑勸募修葺學宮設洒掃會協修縣志不避勞怨銓皆與焉長身鶴立美鬚髯工詩善奕兼寫竹枝尤精堪輿家言道光十一年卒年七十二子三慶淵候選縣佐慶澤慶淮俱崑庠生慶澤字潤甫性質直儉約篤於倫常如其父道光辛巳疫大作秋試同行陳某邁疾危甚人恐延染避之慶澤爲之訪醫調治稱藥量水迨不起經紀其喪以歸硯田外不取非義財本宗多孤寡痛自節損常慮不能徧周其急卒以家貧累重憂傷憔悴終

葛泰臨字輔成明太常卿錫璠五世孫新庠生學務敦行而於承先事尤兢兢邑有神廟藥師殿妙喜庵及名宦聶公雲翰祠皆太常創建泰臨次第修復葛節母周氏官祭專祠益加謹焉太常有書院爲讀書處後廢乾隆乙丑知縣張予介改爲四賢祠祀朱侍御栻周康僖倫歸太僕有光與太常錫璠中經冊毀泰臨會四賢後裔朱銓周澧等集貲修葺嘗因族人遠幕代賠墓糧至鬻其居道光丁亥舉鄉飲賓年七十餘卒

○趙蘭真義人新庠生候選縣佐好施與遇有貧困急難者必代爲謀或獨力難支商之同志必求有濟而後安道光十九年卒年七十二

○唐其昌字峻南德咸曾孫植品端方敦本睦族嘗見家祠毀損獨任修葺族中無後棺木暴露者皆爲收葬祖塋有後而無力營葬者給貲俾安窀穸又創設惜字社於北鄉瀾漕按月僱工收焚至老不怠道光丁亥舉鄉飲賓戊戌病卒年七十三子汝徵字味吟崑庠生

○陳棻字春山崑庠生居半山橋西下塘父宗滙年老嗜學爲徐氏塾師距家里許棻晨夕定省一日早往寢門不啟排闥入視死矣蓋考終如僧怛化隔宵猶飲啖如常也東人憫其貧請置棺殮具不許致賻不受哭踊數次負以歸戚友欲以致死之由詰徐氏謂可得厚賂棻大慟曰父不能養餬口於外子罪已難追若爲不義事

大理滅絕矣且死生有命何與於徐聞者愧服生平無他嗜攻舉業課子讀書屢赴省闈不遇晚歲乃潛心釋典道光辛丑無疾而逝年七十五子煒增生循謹有守燮別有傳

○范其仁字心毅世居石浦鎮少孤孝養祖母王王苦節六十餘年年登大耋仁年將及艾猶時爲孺子慕卒後臚舉事實詳請旌表嘗因猾吏欺誣里中良民勒充差役民勿能堪仁爲設法勸募捐置役田呈請勒石該處卽有差徭不得有累良民民感德之遇有無賴必勸之業資本以營生族戚有不能舉喪葬者必爲之經紀性愛花木家有數百餘種每值花開招同邑王學浩孝

廉青浦吳邦基郡守談詠累日道光丙午疾卒年七十

三

○顧之蘭字介堂甘泉縣訓導壽峰之長子工詩嘗與其族人孝廉國政明經佐堯茂才佐禹刻武陵八子詩蓋其相倡和之作也夏溶倡立普濟育嬰堂規制多之蘭手定重游泮宮年八十六卒子掄字筱亭承父學工詩文早歲餼於庠嘗續劉象春玉山人文集自乾隆迄道光朝末就輯前明至國朝三百年吾邑之隸學籍者原本本世家得以有考賴是編也著有詩集一卷及韻字彙錦行於世

○方逢年字裕千崑庠生明太常寺卿鵬十二世孫逢年

敦品力學邑前輩葛常旭方正士也從游最久學益醇
吳俗每歲元旦家懸先象常旭歿後逢年必衣冠造門
肅拜終身如一日會從弟某受縣尉辱不平爲辨寃尉
遷怒愬令令庇其屬誣以罪陷縲紲詳大吏禱其矜其
從弟亦削武生籍獄始解人咸寃之逢年篤於師恩宗
誼如此平居嗜詩手輯邑先賢詩數百首各製小傳取
宋賢莫子純崑山衆芳所在語題曰景芳集以課子若
孫曰俾無忘舊德又愛藝菊徧植庭階每至九秋與二
三同志賞菊豪吟有陶靖節遺風逢年自甲辰棄諸生
更名曰甲生卒年七十子元熙諸生

○朱文曾字振華祖湯孫父源皆諸生文曾篤倫誼兩兄

省曾壽曾游幕外省事育一身肩之居喪悉遵古禮仲
○兄病瘖歸幾殆願減算益兄禱於天病良已有姊適沈
者聞訃哭之慟謂髫時飲食起居母氏外惟姊是賴每
時祭必以祔母氏食兩兄先後卒倉皇治喪具自以同
懷都盡感痛彌切而鬚髯頓蒼弱冠游岸文法先正訓
子弟孝友忠信有不率教每反已自責不名一非分錢
處事必使無餘憾館吳門潘氏久同門友沈平未失職
食貧分館俸周之卒爲經紀其喪路拾遺金俟以返其
人其不苟取舍如此喜爲詩兼工畫山水撫絲桐自娛
風月佳夕與故人樽酒論學不及世俗語著有詩文若
千卷道光戊申卒年六十六子映台映釗俱諸生

○陳景崧字介巖其先自郡徙崑世習幼科景崧父德昌
兄惟修俱業醫景崧志讀書補新庠生德昌卒兄弟析
箸橐筆四方藉硯田餬口試南闈不售援例入監與都
中賢士大夫交時上海李林松官戶部負文名嘗問業
得其指授嘉慶戊辰中式順天經魁屢上春官不遇遊
幕楚中當路交相引重道光乙未大挑二等補授泗州
虹鄉學教諭景崧與人恭而有禮接諸生和易近人教
士有法喜振拔孤寒士皆頌其德秋滿擢國子監監丞
以老病歸贈詩送行盈篋未幾卒於家年八十一
○王所簡字敬止崑庠增生幼喪母哭泣如成人稍長父
卒隨兩兄襄大事必誠必信營窀穸值天寒河凍徒步

往還幾不克舉窆及期冰解人以爲孝感事寡嫂撫孤
姪恩誼兼至嚴課兩子玉立仁立俱上舍生道光丙午
仁立舉於鄉請誥然以孝廉之名不易副爲勗族兄景
星宰望江往游焉會縣試襄校有以苞苴謀前列者峻
卻之家素貧親族告急必爲設措甚或解衣質錢族祖
墓或無嫡裔或徙異鄉必率子姪親往展禮並訂宗人
輪年致祭其篤於族誼如是卒年六十餘玉立字樹庭
幼稟庭訓儒雅工舉業仁立字得先咸豐己未以舉人
考取覺羅教習需次國子監學正外兄李清鳳督學順
天襄校幕中得父病信急馳歸已不及視含遂壹志奉
母無復有出山意庚申粵匪陷城避江村又遭兄喪獨

頁母播遷自矢殉母以殉國癸亥秋母病亡仁立以哀
毀閣三月亦卒

○汪大瀆字韶九自幼凝重言笑不苟弱冠補弟子員益
勵志品學以坦白待人戚族無力婚嫁喪葬者必竭力
欣助之遇人爭鬪善排解兩造無芥蒂嘉慶中邑中創
建敦善闡費各善舉襄辦不辭勞瘁會李比部以健捐
修文廟創設灑掃局從事恪恭始終如一道光初邑
人朱大松興修兩邑合志司收掌卒事無懈志晚年爲
顧司馬運銓郡中吳京卿廷琛爭相延聘總理會計生
平誠慤推心令人信任類如此年至七十卒

○顧本敬字心乾乾隆丁酉舉人思約孫父有準崑庠生

母葛氏 旌表孝女本敬敦本力學厚重不佻補增生
遠祖墓祭久廢立法合族人遞主其事祭掃母缺叔母
寡而貧迎養於家鄉民貸米富室爲耕種資至冬利償
數倍或盡折閱其新穀乃著小暑給米說勸田主薄其
償咸豐癸丑粵匪陷江甯難民踵至邑人糶之粟不足
勸出糶益之置竹榻使爲坐卧具見小學齋神童詩多
識忠孝節義事募貲刊布付塾師教之縣奉憲檄採訪
節孝令司其事窮鄉僻壤搜考靡遺延講鄉約查燬淫
書剴切曉諭罔弗實心任事家貧授徒暇輒手一編憫
邑中文獻無徵乃羅致自晉迄 國朝人文手書三千
餘篇編類成集張潛之題曰崑山文綜卒年六十一

貴州縣志卷三十一
李傅霖字潤蒼國學生少習舉子業既棄去學詩汎覽
唐宋元明諸大家而一以劍南爲宗間習醫道光辛巳
時疫盛行邑設醫藥局施貧病者傅霖隨病制方十不
失一兩邑侯各書匾以頌晚年益盡心地方公事如施
棺衣藥收埋闈費諸善舉經理井井十餘年不倦又與
吳再錫募增玉山書院膏火士林頌之卒年七十餘子
二寬宸皆諸生傅霖姪賓字閻如補邑諸生旋食餼道
光壬寅隨傅霖募捐創文會局爲書院肄業生童充給
膏火規畫秩然己酉大水襄理勸賑不辭勞瘁性爽直
遇地方事建議不參阿附卒年五十六以歲貢終
○張步雲字東涯干墩人少貿易郡城好音律工書法爲

人篤信因果著銘心雜記勸戒後生間有吟咏爲東涯
小草一卷年八十三無疾而終

○沈際昌新陽附貢生濟困扶危有求必應妻孫氏亦能
出所蓄助夫行善夫婦偕老四代同堂人皆謂厚德之
報際昌卒年七十二孫氏卒年七十六

○李雲燦字縵廷崑庠生明山東巡撫同芳七世孫父楣
字建高諸生母周有心疾竭力承歡家故寒年十八卽
授徒藉脩脯佐甘旨其教人於督責中寓從容涵育意
從游者往往得科名去兄春煥遺孤教養成立游庠有
孤甥二常左右之爲族長族姓有爭競事必多方勸諭
和解乃止嘗賃屋某氏例有貼絕某誅求無厭不滿欲

官 卷三十一
飾辭控官不得已典貸集四百金立杜絕券事乃已又
買田二十畝旋被戚某售去憐其貧不問人以爲忠厚
輒侮之絕未嘗校手輯中丞視履類編若干卷勗子以
立品爲先咸豐庚申避寇東南鄉得脾洩疾卒年六十
二

○朱栻字瞻如太學生幼喪父母哀毀如成人祖東臬增
生栻依戀益謹有姑歸王氏焚燭無依迎養於家如事
諸父弟之輪分析後不能治生竭力飲助邑中公事如
修葺節孝總祠歲時祭享經理無怠協濬劉河刻期告
竣邑人以栻優於才公舉辦敦善闡費等事道光己酉
大水又勸撫卹事宜議敘府知事成豐初粵匪滋事奉

憲諭勸紳富助餉抵賦以濟保衛經費并留養江甯難
民栻秉公勤慎按口給糧無遺無濫卒年六十

○王用侯字子愚居角直新庠附貢生事繼母孝課徒自
給不取非分錢里中設義塾施帳被恤發惜字穀等會
俱倡始而銀錢出入不假手爲鄉里推重卒年七十二
○顧錫祉字景繁號竹樓國學生居茜墩鄉賢亭林先生
齋孫素性磊落閒雅喜名人書畫不惜善價購之家有
庫樓藏弄充棟并儲亭林所輯書籍尤多鈔本未刊遺
箸好善舉晚年倡捐建邑城義塾並捐貲襄辦闡費局
務至今賴之年七十餘卒子瀉德邑諸生年未三十卒
○王承露字欣榮高祖廷爵始由太倉遷崑父起鳳有隱

德承露少勤學年十六而孤卽主持家務棄舉業肆力經史兼好吟咏小試不利爲太學生居心忠厚鄉黨稱善人咸豐庚申粵匪陷城避居北鄉之鈕家浜教讀謀生並課諸子意豁如也同治二年七月卒於盛涇陶宅年六十一

○葛辛標字升庭錫璠七世孫新庠生生平名節自勵咸豐庚申遭粵匪變誓不畜髮避於鄉有僞職某賂金求司文案堅拒之夜半遁去授徒西鄉克復後家祠燬廢重建節母專祠馬鞍山陽火神廟東偏妙喜庵爲葛氏先人清修所亦毀於賊辛標新之四賢祠向爲葛氏經理辛標於家祠旁構一室奉四賢神主官祭得無缺又

爲火神廟募建山門事皆克舉年六十二卒

○黃尚功字敘九太學生少孤友愛其弟弟長厚里猶兩
次以人命誣陷皆代赴訟庭侃侃力辯邑令史璠吳時
行嘉其義且詞直得白居易恆恂恂不與人爭年六十後
閉門課孫道光己酉水災出廩粟賑貧民明年買穀以
施稻種邑尊王省三延爲鄉飲賓力辭之咸豐庚申年
八十三聞城陷鬱鬱以歿次子謙字受益太學生敦樸
如其父鄉里有善人之目性至孝父中年患病不食旬
餘百計籲天求所欲食者卒開其胃納而愈得享高年
謙亦年近七旬卒

○錢信字復言諸生少負大志諳世務遊歷西吳甌越兩

楚嶺南所至交賢士大夫罔弗爭迎相倚畀入冀為縣
佐掣分楚北需次驟患疫暈即投牒歸里生平敦內行
生養死葬悉盡誠撫幼慈而嚴遇柔粹利病必直言相
告嘉慶甲子霪雨傷稼灾黎攘奪大吏檄飭所司勸捐
糶粥以濟邑侯李汝棟遴信董其事信力陳三弊請改
糶為折可節浮費以均實惠邑侯白大吏允所請境內
帖然道光戊子卒年七十四邑人吳映奎為撰傳

崑新兩縣續修志卷三十一終

